


धर्मादित्य धर्माचार्य
व
नेपाल भाषा व थ्वयां साहित्य



सम्पादक
चित्तधर 'हृदय'

रवि शाक्य, इखाउँ, यल

धर्मादित्य धर्माचार्य

व

नेपाल भाषा व थ्वया साहित्य

सम्पादक

चित्तधर 'हृदय'

पिकाक :—

कलकत्ता नेपाल भाषा साहित्य गोष्ठी

४ नं० रामजीदास जेतिया लेन

कलकत्ता-७

नेपाल संबत् १०८४ दिहागाः ३०

न्हापां

मू० १ ।

थाकू :—

अम्बिका प्रेस

७, बडौदा ठाकुर लेन,

कलकत्ता-७

पिकाःपाखें

थव नेपाल भाषा साहित्यया इतिहास धाय त्वःगु स्वर्गीय धर्मादित्य धर्माचार्य थव हे कलकत्ता महा नगरे चवनाः ने० सं० १०४५-१०५० तक सम्पादन याना थका विज्याःगु 'बुद्धधर्म ब नेपाल भाषा' पत्रिकाय् चवंगु वस्पोल धर्माचार्यया यक्व अनुवाद व मौलिक लेख मध्ये भी नेपाल भाषाया निति महत्व पूर्णगु थव 'नेपाल भाषा व थवया साहित्य' यात त्वयक भी कवि चित्तधर 'हृदय' नेपालया कालेजे नेपाल भाषा व्वनिपिं विद्यार्थीपित ग्वाहालि उवीक परिश्रम पूर्वक मालाः चवया बिया दीगु वस्पोलया जीवनी सहित पिकाय दुगुलि कलकत्ता नेपाल भाषा साहित्य गोष्ठीं धाथें नेपाल भाषा साहित्य सफुली छपौ पौ तना धकाः गौरव ताय थाय दु। छाय धाःसा गोष्ठीया संस्थापक सदस्यपिनि उदारतां पिकाय् फुगु थव सफुलि नेपाल भाषा साहित्यया अन्वेषणात्मक अध्ययन याय् माःपिं बी० ए०, बी० ए० अनर्स व एम० ए० या भावी विद्यार्थीपिनिगु नेपाल भाषा व साहित्यया इतिहास सम्बन्धी अभाव छूं भचा सां अवश्य पूर्ति याइ।

कलकत्ता नेपाल भाषा साहित्य गोष्ठी

धर्मादित्य धर्माचार्य व “नेपालभाषा व श्रवया साहित्य”



स्व० धर्मादित्य धर्माचार्य

ने० सं० १०२२—८३

धर्मादित्य धर्माचार्य

ने० सं० १०२२—१०८३

“नस्वाः नस्वाःगु स्वांज्वाःया मनस्वीया निगू गति
लोकया शिरया शोभा वा वने हे गनावनि ।” (सु० सौ०)

धातृ भौ नेपालभाषा भाषीपिनि “दत्तले कुचाः” नीति यानाः नेपाल
भाषाया अनन्य सेवक, बौद्धधर्मया न्हापां न्हापांया प्रचारक धर्मादित्य
धर्माचार्ययात निगूगु गति अर्थात् नस्वाःगु स्वां वने हे गना वं थें
ज्वाकाच्चनेमाल ।

ख न वस्पोलं गुलि नेपाल भाषा साहित्य व बौद्ध धर्मया सेवा यात व
बौद्धधर्म व नेपालभाषा प्रति कथ्याःगु हृदयं यात । फलस्वरूप अबलेया
मिच्छ्याःगु राणा सरकारया कोप भाजन नं ज्वा माल । छु याय् ज्यू
वस्पोलं थव खँ बांलाक हे स्यू—

“स्वाय् दैगु सां युग-युगान्तर सीगु थौं सां

न्यायं छुया लिचिलि धीरतन्हागु जूसां ।” (सु० सौ०)

उकिं वस्पोल लिचिलि मबिज्याः, दुर्गच्छि उत्साहं मनुष्यताया नातां
धर्म व भाषाय् समान हक दय्माः धकाः लाभालाभया वास्ता मयासे थःगु
न्यायोचित विचार लोकया न्ह्यःने तथा बिज्यात ।

तर वस्पोलया थुगु सत्य बीजं अनेक प्रकारया मातृभाषानुराग व धार्मिक

जागृतिया चुलि वयाः अनेक पुस्तक पुस्तिका रूपी स्वां ह्वयाः जिमि गुरु योगवीरसिया—

“नेपालभाषा जीर्ण जूगु अलिस मचासे भिक्खु नु

भारतीय शास्त्र भवनं मान श्वेतः वीक्खु नु ।” (यो०सु०)
धयागु स्वप्न सार्थक ज्वीक म्नी त्रिभुवन विश्वविद्यालयया बी० ए० तक नं
उकिया सुवासं व्याप्त जू थै थाय् खासे न्हून्हूगु बिहार स्थापना जुयाः अनेक
मिक्षुपिं फल सःथै सयाः नेपाले चतुर्थ विश्वबौद्ध सम्मेलन पर्यन्त जुयाः थव
नित्तां—धर्म व भाषा—या छुं मचा पुनरुत्थान जुया वःगु वखते लाक्क
बसपोल धर्मादित्य धर्माचार्य नेपालसंबन्ध १०८३ दिहा गाः ३० संचवाः खुनु
परलोक जुया बिज्यात ।

उकिं आः म्नीगु थःपिनि चलन अनुसार मदय्काः जूसां विचाः ला
याय् हे माल, म्नासँ, वस्पोलया जीवनी विषये विचाः याना स्वय्—

नेपाल सम्बन्ध १०२२ साल बङ्गला थो १४ खुनु कलाकारतय् क्रीडा-
स्थल यल देशया चिकं बहिली ‘बाडा वैद्य’ धकाः स्वनिगले नां जाःगु वैद्यकुले
वस्पोलया जन्म जुल । वस्पोलया मचाबलेया नां श्री जगतमान वैद्य
खः । वस्पोल या लुबा स्वनाम धन्य बैद्यराज वृषमान व स्नेहमयी मां
मुनिथकू खः । दकले चोधीम्ह काय् जूगुलिं मां-बबं यत्थे तया तःगुलिं
मचा थमं धाक माःसां वस्पोलपिनि कुल हे विद्याव्यसनी जूगुलिं उगु आखः
ब्बं पिं आखः सःपिं धयागु पचिगली नीत हे मगाः थै च्वंगु समये नं
वस्पोलया दाजुपिं सर्वश्री रत्नमान, मुखिया सूर्यमान, डा० योग्य-
मान् व डा० इन्द्रमानपिन्त थै हे वस्पोलयात नं शिक्षा-दीक्षाया माःगु
प्रबन्ध जुल । धात्थै वस्पोलं नेपालया द्वाँर हाइस्कूले ब्वनाः कलकत्ताय्

म्यात्रिकुलेसन पास यानाः कलकत्ता युनिभर्सिटी भर्नाजुया बिज्याःगु जुयाचवन । थुथाय् वस्पोलपिं भोक्कि ल०पु० स्वथत्वाले च्वं बिज्याय् धुंकल ।

भारततय् स्वराज्य-भावना दना वया च्वंगु बखत, उकीसनं कलकत्ता युनिभर्सिटिया महान्-महान् आचार्यपिनि सत्संगतं नेपालभाषा व बौद्ध-धर्मया महत्वया विषये आपालं खँ न्यने स्वय् खंगुलिं वस्पोलया मने नं धर्म प्रति श्रद्धा व मातृभाषानुराग दना वया च्वन ज्वीमाः । उकिं वस्पोल गर्मिया बिदाय् नेपाः बिज्याःबले लङ्का, बर्मा व जर्मनी क्वापे जूगु आपालं बौद्ध चित्र हया बिज्याःगु जुया च्वन । उकियानाः नकतिनि नकतिनि पं० निष्ठानन्द वज्राचार्य 'ललित विस्तर' नामं भगवान्या जीवनी व भद्र-कल्पावदान आदि दुगु बाखं सफू पिकया तःगुली मिखा छुना बी थें जुयाः नेपालपुत्र भगवान् शाक्यमुनिया जन्म, बोधि प्राप्ति व निर्वाण दिन नं चूलाःगुलिं स्वांवा गानाः स्वांया यात्रा थें जूगु 'स्वांयाःपुन्ही' (वैशाक पुन्ही) या महत्व नं सिया खना वल । अले थाय् थासे—यले, येँ नं स्वांयाःपुन्हीया पूजा-उत्सव याय्गु जुया वल । नापनापं मदुत्वाले थ्व हे बौद्ध चित्रया क्कगु प्रदर्शनी नं जुल ।

लिपायाखुसी नेपाः बिज्याःबले आपाःसिनं वस्पोलयात म्हासिल । उथाय् थयंबले वस्पोलं थःगु नां 'धर्मादित्य धर्माचार्य' याना बिज्याय् धुंकल । अले वस्पोल नाप बुद्धधर्म व नेपालभाषाया विषये अनेक खँ जुयाः नेपाल संबत १९४४ साल दिलापुन्ही खुनु धर्मा साहुया न्यातजाः ववथाय् 'बुद्धधर्म उद्धार संघ' नामं क्कगु संघ स्थापना जुल । उकिया सदस्यपिं सर्वश्रो धर्मादित्य धर्माचार्य, खड्गराज, त्रिरत्नमान्, बुद्धिरत्न, कुलदीप व थ्व पंक्तीलेखक नं जुल । तर अज्याःगु स्वांपुयाः पलाः तय् माःगु जमानाय् संघ, सभा धयागु छुं स्वय् मननिपिं सदस्यपिसं मेगु छु ज्या याइ । अथ्यनं

वस्पोलया निर्देशने ळगू निगू धार्मिक सफू स्वयूगु, पंचशील कयाः त्रिशरण वनेगु व वस्पोलया निवासस्थाने वनाः वस्पोलं अंग्रेजी अथवा पालीया अर्थ छ्यानाः नेपालभाषां धयाहया बिज्याइगुयात कार्बोन पेपर तयाः चवयूगु ज्या सम्म लच्छि लत्याति जुया वन । उकी मध्ये निगू प्यंगू लेख वस्पोलं 'बुद्धधर्म' पत्रिका कलकत्तां पिकया बिज्यासैलि उकी प्रकाशित याना बिज्याःगु दु ।

अथे हे थव हे साले गुंलाथो अष्टमि खुनु यलया इल्हाननि बाहाले वस्पोलं 'बुद्धोपासिका संघ' नं स्थापना याना बिज्यात । उकिया सदस्यपिं सर्वश्री धर्मादित्य धर्माचार्य, हीरामाया व धनमाया । थव निगुलिं संघ स्थापना जूगु खँ नं बुद्धधर्म पत्रिकाय समाचार रूपं पिकया बिज्याःगु नं दु ।

किंदोँ बाहा जीण जुया च्वंगु यक्कं दत । बाहाया मेगु छेया ला मुतिकाः हे खने मदु, मुख्य क्वाःपाःछे नं फुकं दुनाः सारिपुत्र मौद्गल्यायनं सहित भगवानया मूर्ति व मेमेगु नं यक्व त्वहँया मूर्ति अथे वां दायाः वथं गया च्वंगु स्वयू हे कन्याचायापुसे च्वं । उकिं वस्पोलं साहु साहुपिं मुंकाः अन स्वः बिज्यात । नापं जिपिं संघया सदस्यपिन्त नं यंका बिज्यात । लिपा सरकारे नं खँ थ्यंकाः सरकारं ब्यूगु १५०० तका दां व मेगु साहु साहुपिके चन्दा थयाः व विहार ल्हंकेगु नं याका थका बिज्याःगु दु । थथे थव बाहा स्यना च्वंबले अन दुगु ब्याक्क मूर्ति भो छुकाः वस्पोल नं नापं फेत्तुनाः कया तःगु फोटोया ब्लक 'बुद्धधर्म' पत्रिकाया प्रथम अंके छापे नं जूगु दु ।

थुथायू हे धर्मासाहुया थायू खामानिसै दण्डवत यानाः नेपाले स्वयंभू दर्शन याःम्ह कयांछेलामा थ्यना च्वंगु । जिपिं संघया सदस्यपिनि

धर्माचार्य नाप अथे धर्मया विषये खँहा बल्हा जुया च्वंगु खँ सियाः धर्मा-
साहुं लामा धर्मयागु खँ नं छुं भति थ्वीके-सीके माः, अभिगु नं फुक धार्मिक
भै कंघूर तंजूर (त्रिपिटक व तन्त्र मन्त्र) धकाः निगू भागे इना तःगु
द. उकिं थव लामायात नं लुको बाखं कंकाः न्यने माः धकाः सल्हा बिया
दीगुलिं वस्पोलया अनुमति कयाः न्हापां जिपिं खड्गराज, त्रिरत्नमान, बुद्धि-
रत्न, कुलदीप, देवरत्न व थव पंती लेखकं नं बाखं न्यना । यतखाबाहाया
वेखारत्न साहुं सँय् भाय्यां नेपालभाषां अनुवाद यानाः कना दीगु । बाखं
बांलाः जु, विशेष यानाः सप्तत्रिंशत बोधिपाक्षक आदि बौद्ध धर्म विषयक
खँ व शीलाचरण सम्बन्धी खँ ।

लिपा वस्पोल धर्माचार्य थःगु बिदा फुकाः कलकत्ता तुं बिज्यात । अन
थःगु अध्ययनया नापनापं बुद्धधर्म पत्रिका नं प्रकाशन यानां बिज्याना
न्वन ।

वयां लिपा व लामाया बाखं मेमेपिं यक्व मनूत वयाः न्यन । धर्मा-
साहुया प्यते मन्थनाः मञ्जुश्री पर्वः थाने कन । हानं यले नाग बाहाले
धाख्वाः साहुपिनि छेँ नं वनाः कन । थथे बौद्धत भचा दनाः धार्मिक विषये
छुं भति चर्चा याना इःगु खनाः जिमि गुरु योगवीरसिंहं व हे लामां कंगु
धर्म विषये 'धर्मसार भाषा' धकाः संसार सागर बिचे कविता च्वयाः
प्रकाशित याना दिल । तर वयूकः व प्रकाशक श्री भवानीवीरसियात नं
ज्वना यंकाः इति १०।१० तका दां जरिवाना याना हल । समिति अडाय
पास मयासे छुं छापे याय् मज्यूगु ऐन नं दय्का बिल ।

थथे बुद्धधर्मया प्रचार व बौद्धत भचा जाग्रत जुया वःगु खनाः उखे
राणा सरकारया इन्द्रासन सन थुंखे लामाया मान सत्कार जूगु खनाः
गुभाजुपिनि नुगः मुल । फलस्वरूप भुजित्वाका ज्वीपिं कर्मचारीतय्

हाहा: ले वना: सँय्या थाय् वना: दीक्षा कया: सँय्यात भागि यात धयाग
आदि दोष बिया: यँ यलया गुभाजुतसँ लामायात अनि मयाना, शिक्षा
मकया धका: भौँ च्वया व्यु, मखुसा पतिया का: हुँ धका: थ: उदाय् बरे
जयमांतय्गु पूजा हे गोन्हु गोन्हु मयाना ब्यूबले परम्परा प्रेमी बौद्धत इथाय्
चाया: न्हापां यलेतसँ पतिया कया: पुरोहित वर्गयात संतुष्ट यात । लिपा
यमितसँ नं गुलिसिनं भौँ च्वया बिल गुलिसिनं पतिया नं का: वन,
गुलिसिनं छुं नं मयासे सुं क च्वना च्वन ।

थथे न्हापांसँ धार्मिक सम्बन्ध दया: गबलें लानापिके स्यना कया च्वंगु
गबलें गुभाजुपिसं लानापिन स्यना वया च्वंगु पुलां खँ लोमंका: लामा भागि-
याना:पतिया का: हुँ धा:गु अधार्मिक खँया विरोधे वस्पोलं “लामा भागि-
याना: छुया पतिया ?” धयागु ढगू पांफ्लेट नं कलकत्तां पिकया
बिज्या:गु दु ।

थुथाय हे नेपालया बौद्धजनय मेगु नं ढगू खलबल वल । स्वयम्भू-
त्हंबले ज्यामि जुया: वया च्वंम्ह श्री छेरींनोर्बु लामां जामाच्चे ढगू पाके
खुदँ तक तपस्या च्वना: पिहाँ वया: धर्म थ्रद्धादुपि सर्वश्री प्रेमबहादुर श्रेष्ठ,
बुद्धरत्न शाक्य, दालचिनी मानन्धर, वेखाराज शाक्य, व ज्ञानरत्न शाक्य-
पिन्त तिब्बती धंगं भिक्षु छुना: पित हस्यंलि खुम्हसितं ज्वना यंका: बौद्धत
शैव जूसा छुनि छु, शैवत बौद्ध जुल धा:सा बौद्ध जूम्ह व बौद्ध छूम्ह
आचार्ययात नं तच्चोगु जेल सजाय ज्वीगु ऐन नं दय्का: खुम्हसितं नेपालं
पितिना छव्त । सकलें कळकत्ता थ्यँसँलि वस्पोल धर्मादित्यं खुम्हसितं नाप
लाना: अनया महाबोधि सोसाइटी नाप सम्पर्क तया: सकसितं मा:मा:गु
स्यनेकने व ग्वाहालि इत्यादि ज्वीका: नं थव बुद्धया जन्मभूमि नेपाले बौद्ध
धर्म प्रति जूगु अन्यायया खँ सकनां भारतया पत्र पत्रिकाय् प्रकाशित नं

याका बिज्यात । लिपा लामा नापं प्रेमबहादुरया 'महाप्रज्ञा', बुद्धरत्नया 'महाचन्द्र', दालचिनीया 'महाज्ञान', वेखाराजया 'महावीर्य' व ज्ञानरत्नया 'महाक्षान्ति' नामं गुलिं तिब्बत व गुलिं आक्याव (बर्मा) पाखे वनाः बौद्धधर्मया अध्ययन याः वन ।

भारते वनाः व्यापार वा मेगु लजगाः याना च्वंपि नेपाली बुद्धमार्गीपि थाय्, बाय् लाय् व पासा-ग्वाहालि इत्यादि मदयाः अनेक प्रकारं दुःख, कष्ट नया च्वंगुलिं थव फुक सीकाः थवीकाः हय् फय्केत व बुद्ध धर्म छु, उकिया महत्व गुलिं दु सकतां सीकाः उकिया अनुसार आचरण नं याय् फय्केया निंतिं वस्पोलं कलकत्ताय् 'नेपाली बुद्धमार्गीसंघ' धकाः छगू संस्था स्वना बिज्याःगु दु । अथे हे बुद्धधर्मयात न्हापा न्हापा थें भारते न्यंक प्रचार ज्वीकेत बंगाली बौद्ध संस्था धर्मांकुर सभा नाप सम्पर्क तयाः कलकत्ताया धर्मांकुर विहारे थः हे सेक्रेटरी जुयाः इसाया १९२८ या अन्ते 'आल इण्डिया बुद्धिष्ट कान्फरेन्स नं याना बिज्याःगु दु । थुकियागु फोटो अंग्रेजी बुद्धिष्ट इंडिया पत्रिकाय् छापे जूगु दु ।

थुखे नेपाले धार्मिक जाग्रतिया नाप नापं मातृभाषाया महत्व नं भनि भति सीकाः थवीकाः जिमि गुरु योगवीरसिया ल्यूट्यू सर्वश्री वैकुण्ठ प्रसाद, इन्दुनाद, रत्नमान, सिद्धिरत्न, महाप्रज्ञा, हरिकृष्ण पूर्णनारायण, फत्तेबहादुर, तुलसी मेहर, वेखारत्न, श्री प्रसाद, पूर्णमान, सहस्रत्र गुणानन्द, रत्न, लक्ष्मीनानी व थव पंक्ती लेखक आदि आदिपिसं नं नेपालभाषा साहित्यया कविता पाखे मन बिया हःगु व शहीद शुक्रराज शास्त्रीं नं 'नेपाल भाषा व्याकरण' च्वयाः थमं हे प्रकाशित याना दीगुलिं वस्पोलं पिक्यातःगु 'बुद्धधर्म' पत्रिकायां 'बुद्धधर्म व नेपालभाषा' धकाः नां छुनाः धार्मिक लेखया नापं साहित्यिक-लेख कविता नं तयाः पाठ्य सामग्री दय्के थें

‘नेपाल भाषा पद्य संग्रह, नेपाल भाषा गद्य संग्रह’ धका: ने० सं० १०४८ निसैं पत्रिकाया रूप हीका बिज्यात । नाप नाप नेपाल भाषाया विकास व प्रचार याय्त अनेक प्रकारया पंगल: दया त्वंगुलिं नेपाले व विदेशे नं नेपालभाषा व साहित्यया रक्षा, प्रकाश व प्रचार याय्या नितिं ने० सं० १०४८ सालया श्रीपञ्चमी खुनु कलकत्ताया धर्मराजिक चैत्य बिहारे ‘नेपाल भाषा साहित्य मण्डल’ नं स्वना बिज्या:गु दु ।

थव फुक्क वस्पोलया मातृभाषानुराग व धर्म श्रद्धा खना: श्री वैकुण्ठप्रसाद लाकौलं छपु कविता व श्री सिद्धिरत्नं छपु कविता च्वया: छ्वया दीगु दु, गुगु ‘बुद्धधर्म व नेपालभाषा’ ३११.२ अंके व ३१५.६ अंके प्रकाशित जूगु दु, कविता थव हे खः—

धर्म आदित्यया धर्म सेवा

भो बौद्ध सज्जन सुधारक कर्मवीर,
कार्यक्षमी नियमपालक आर्यवीर,
उत्साहशील नरपुङ्गव अग्रगण्य,
धन्य प्रतिक्षण छितः जिगु धन्य धन्य !
बुद्धैगु नांजक दनी मदु वैगु सार
न्हून्हुगु तामसिक धर्म खना प्रचार
उद्योग यत्न अति यात सुधार-जन्य
भो देशया समय-पुत्र छि धन्य धन्य !
निर्जीव तुल्य जनया मृत तुल्य भाषा
उन्नीत यायत सदान दृढाभिलाषा,
याना स्वदेशयित भक्ति तया अनन्य
निस्वार्थ भाव तलछि गुलि धन्य धन्य !

विद्या मदेक जनया गन धर्म धैगु
निर्वाण उत्तमगु तक्कनँ दैगु दैगु
विद्या प्रचार अकिँ छि छिगु धर्मया न्ह्यो
याना छितः सफल यायिगु धन्य धन्य !
बाधा व विघ्नतयसं प्रतिपाद पादे
लाकेत अज्ज जुल दुःख बिया फसादे,
बाधा छितः नि मदु धीर छिजोम्ह अन्य
भो अन्धकार तमया मत धन्य धन्य !
अज्ञानतायिगु मुले चिकुलां मतापं
द्यपि अनेक जनतेत थनेगु तापं
धर्मैगु शंख पुल छि न्हिथँ धन्य धन्य
एवं सहायक महाशयपिन्त धन्य !

— वैकुण्ठ प्रसाद लाकौल

जगतमानया देश सेवा

मखन मखन मेपि पक्ष जूये जि धापि
छि छम्ह लुल थनं का ज्ञान् बिया पक्ष यःम्ह
अधिक धरम आत्मा धावनं लोकनं का
अधिकन उपकारी धन्य छी जगतमान !
परहित म्हसियावः अर्ति छीन च्वयाव
दयकल छिन मास्की ज्ञानया मूल पत्र,

लुमन लुमन साधू जूम्ह छी बुद्धिरत्न
अधिकन उपकारी धन्य छी जगत्मान !

—सिद्धिरत्न

थथे नेपालभाषाया उत्थाने व बुद्धधर्मया प्रचारे ब्वां जुया बिज्याःगुलिं वस्पोल परीक्षाय् फेल जुल खनी । अले थव हे त्वह चिनाः वस्पोलया छात्र-वृत्ति नं राणा सरकारं बन्द याना बिल ।

मेगु दार्जिलिङ्ग पाखेया नेपाली बौद्धतय् नेपालया बौद्धतय् अवस्था व नेपालया बौद्ध-संस्कृति थवीकेत व विदेशे नं प्रचार ज्वीकेत थः हे सम्पादक जुयाः परवतिया भाषां 'हिमालय बौद्ध' व अंग्रेजी 'बुद्धिष्ठ इण्डिया' नं थः व बी० एम० बरुआ सम्पादक जुयाः ने० सं० १०४८।४९ पाखे प्रकाशित याना बिज्यात । अथे हे ताल्लाया छुट्टी दार्जिलिङ्ग बिज्यानाः अन क्कगू महिला संगठन दय्काः चौके क्कगू महिला स्कूल नं चाय्का थका बिज्याःगु दु । अथे हे कालिम्पोङ्गे नं सर्वश्री भाजुरल, मणि हर्ष ज्योति, श्री प्रसाद, मानदास, हर्षदासपिन्त नं उपासक यानाः क्कगू संस्था दय्केगु याना थका बिज्याःगु दु ।

वस्पोलं थथे थःगु नेपालभाषा व नेपाली बौद्धतय् विषये जक ध्यान तया च्वना बिज्याःगु मखु, विश्वया बौद्धतय् पाखे नं उलि हे विचाः याना च्वना बिज्याःगु दु । भारतया सुपुत्रपिं अग्रश्रावक सारिपुत्र मौद्गल्यायनपिनि पवित्र धातु साचीं लिक्कयाः इंग्ल्याण्ड यंकातःगु हानं भारते हे लित हय् माः धकाः नं वस्पोलं माँग याःगु दु । अथे हे बुद्धगया मन्दिर सलंसः दनिसें महुन्तया ल्हाते लानावया च्वंगु लिकाय्त् गुगु आन्दोलन अनागारिक

धर्मपालं याना दिल, भारतया अदालते ल्वाल्वां बिलायत थ्यंकनं बुद्धगया
बौद्धतय्गु ज्वीमाः थकाः ल्वाना दिल, उकी नं वस्पोल धर्मादित्यया पूरा ल्हाः
दु । उकिं उगु वखते जापाने ज्वी त्यंगु वरल बुद्धिष्ट कन्फरेन्से नं
सेक्रेटरी ज्वीत वस्पोलयात ३०० यान सहित निमन्त्रण वःगुली वस्पो-
लया छु याय् छु याय् जुयाः नेपाले न्यना हया बिज्यात थें नेपालया राणा
सरकार पाखें हानं नेपाः वय् मोसाहुँ धयागु तालगु लिसः वंगुलिं वस्पोल
जापान बिमज्याः । व थासे श्री बी० एम० बरुआ छ्वया बिज्यात ।

थुगु प्रकारं वस्पोलं थःगु उत्थानया च्यूताः मतसे अज्ज नेपाल भाषायात
कलकत्ता युनिभर्सिटि व पटना युनिभर्सिटि नं मान्यता बीके माल धयागु सः
पिकया बिज्याःगु दु । हानं इलाहाबादे जूगु समस्त हिन्दुस्थानया पण्डित
महासभाय् नं वस्पोलया 'नेपालभाषा व श्वया साहित्य' लेखया
अंग्रेजी अनुवाद पाठ जूगु दु ।

नेपालभाषाया उत्थानया निंति वस्पोल थथे हाला सना जूसां नेपाल
भाषाभाषीपिसं थुकी नाकं मन मव्यूगु खनाः फ्रान्सया महा पण्डित सिल-
मेनलेभी वस्पोलयात छ्थाय् च्वया हयादीगु दु—

“Being an old lover of your old language, I
suffer on seeing itro ill-treated in your hands, as
an old mother dealt with too roughly by her
son.”

थुगु प्रकारं कलकत्ताय् च्वनाः भाषा, धर्म व समाजया सेवा यायां अन
चवँतले भिक्षुपिसं थें अष्टशील धारण यानाः वस्पोलं कलकत्ता विश्वविद्यालयं
पाली एम० ए० याना बिज्यात । लिपा डि० डि० एच, बौद्ध साहित्य
रत्न, सद्धर्म रत्नाकर (भारत) हिन्दी साहित्य रत्न, एम० बी० एच,

(देहरादून) एच० एम० डि०, वैद्य कविराज, भिषग रत्न, भिषगाचार्य
(आगरा) एफ० सि० आइ० एफ० आर, इकन्० एस (लण्डन) इत्यादि
नं जुया बिज्यात ।

थये सर्वतोमुखी विद्याया अनेक तिसांतियाः वस्पोल नेपाल थ्यसेलि
न्हापांनिसैया वस्पोलया प्रेरणां थाय् थासे स्वांयाः पुन्हीया बुद्धजयन्ती जुया
वया च्वंगुली किन्दो विहार नं जीर्णोद्धार याःगु बांलाक सिधसेलि अन जूगु
वैशाख पुन्हीया सभाय् न्हापां न्हापां लंकां भिक्षु छुनाः छवया इया तःपिं
मध्ये क्कम्ह अनिरुद्ध भन्ते नापं वस्पोलं नं छगु सारगमित व्याख्यान यानाः
किन्दो विहारया पृष्ठ भूमी नेपालया उपासकपिनि धार्मिक श्रद्धा व दान-
शीलताया प्रशंसा याना बिज्याःगु दु ।

लिपा नेपाले उद्योगपरिषद स्थापना जुसेलि उकिया खर्दार जुयाः
तःदँ तक हे ज्या याना बिज्यात । नाप नापं श्रीमती अष्टमाया नापं
विवाह यानाः गृहस्थी याना बिज्यात ।

विक्रम १९९७ सालया प्रजापरिषदया हूल कूले प्रजापरिषदया सद-
स्यपिं व मेमेपिं नं यक्व न्ह्यःने खने दुपिं परिवर्तन बा सुधारवादी व्यक्तिपिं
ज्वना यंकुबले वस्पोल धर्मादित्य धर्माचार्ययात नं ज्वना यंकाः सिद्धवरे
कुना तल । वस्पोलया खानतलासी पिहाँ वःगु भोँ-पत्रो कलकत्ता बुद्ध
मार्गी संघ आदिया सदस्यपिनिगु नामावली नं लुगुलि उकी नां जक दुपिं
साहु साहुत व उगु वखतया कलकत्ता विश्वविद्यालयया विद्यार्थीपिं नं ज्वना
यंकाः लांलां तारीखे तःयंकु तल । लिपा तिनि धर्माचार्ययात नं तोतेगु
जुसेलि मेमेपिं तारीखे वया च्वंपिनि नापं वयूकःपिं सकसितं तारीख लिक्था
बिल । प्रजापरिषदया अध्यक्ष श्री टंकप्रसाद सहित थव पंक्तिलेखक नापं
३० म्हसित जेले छवत । अनंलि वस्पोलं ५।६ दँ तक छुं प्रकारया

सामाजिक ज्याय ल्हाः मनसे व हे साहुतय्गु व्यापार विषयक ज्या यानाः संतोष जुया च्वने माल ।

विक्रम १९९९ साल पाखे भिक्षु अमृतानन्द आदि भिक्षुपिं लंकां लिथ्यंकाः मञ्जुश्री पर्वः थाने लच्छि तक धर्म व्याख्यान याःगु जुया च्वन । अथे हे थुथाय् थ्यंबले मेमेपिं नं थेरवादी भिक्षुपिं बर्मा नं नेपाः थ्यंकः वःगु व अनेक श्रामणेर व अनागारिकापिं नं वृद्धि जुजुं वया च्वंगुलिं हानं छको बुद्ध धर्मया चहचकि खने दया वल । हानं 'बुद्ध धर्म व नेपाल भाषा' पत्रिका बन्द जुया च्वंगुलिं थःपिनि भाषाया पत्रिका छुं स्वयं मदया च्वंगुलिं ल्हासाया नेवाः साहुतसें भारतीय तका १६११ दां चन्दा सहित अनुरोध नं याना इःगुलिं सारनाथं पिहाँ वया च्वंगु 'धर्मदूत' पत्रिकाय् हिन्दीया नापं ३।४ पौ नेपाल भाषां नं तयाः पिकया बिल । गुकी सर्वश्री भिक्षु प्रज्ञानन्द, सुबोधानन्द, अमृतानन्द, महाप्रज्ञा, मोतिलक्ष्मी, प्रज्ञाधन, परमानन्द, हर्षरत्न, भुवनलाल, बाबुकाजि, पु०वा० नेवाः आदिपिनि लेख नेपाल भाषां प्रकाशित जुयां च्वन । थथे बुद्ध धर्म व नेपाल भाषां हानं छ्यैः ल्हना इःगुलिं दुगुं मदुगुं दोषारोपण यानाः वर्षावास याना च्वंपिं भिक्षुपिं सकसितं २००० सालया श्रावण १५ गते खुनु नेपालं पितिना छवत । अनागारिकापिन्त जक व्याख्यान याय् मखु धकाः भोँ च्वकाः किन्दोल बिहारे हे तल । थुलि जक गन, स्थविर धम्मालोक व भिक्षु अमृतानन्दपिनि सम्पादकत्वे पिहाँ वया च्वंगु ज्ञानमाला सफूया मेहाला च्वन धकाः स्वयंभू-ज्ञानमाला खलःद्वियातं लां लां तक तारीखे तःव्यंका तल ।

पिहाँ वंपिं भिक्षुपिनि गन वने गन च्वने जुयाः सारनाथ थ्यंसेलि अमित नय्, त्वने, च्वनेगु थाय्था बन्दोबस्त याय् सारनाथे चन्द्रमणि महास्थविरया अध्यक्षताय् 'धर्मोदय' नामं छगु सभा स्थापना यानाः

बुद्धधर्मया अनेक सफू नेपाल भाषां थाय्थासं प्रकाशित याना हया च्वन ।

विक्रम २००३ साल क्यँ जक क्यन लंकाया वजिरारामया नारद थेरया नायकत्वे भिक्षु प्रियदर्शी, भिक्षु अमृतानन्द, डा० रत्नसूर्य, प्रो० आर्यपाल न्यामहस्या छगू बौद्ध शिष्ट मण्डल नेपाः थ्यन । थथे ऽदँ लिपा भन्तेपि खंबले उपासक उपासिकापि सकलें ल्युताल । व शिष्ट मण्डलं पद्मशम्शेर महाराजया थाय् आनन्दकुटी लंका चैत्य दय्केगु, पित्तिना तःपि भिक्षुपिं नेपाले दुत काय्गु आदि बौद्ध धर्म सम्बन्धी खँया नापं नेपाल भाषायात नं छुं सुविधा बीकेगु नं खँ छुत थै, लोक प्रिय ज्वोगु प्रबल इच्छा दुम्ह पद्मशम्शेर महाराजं उदार नीति कयाः पित्तिना तःपि भिक्षुपिं सकलें दुत काल । भंसारं व पोस्ट आफिसं पना तःगु नेपाल भाषाया सफू लित बिया हल । समिति अडाय् नेपाल भाषाया निति छगू फाँट दय्काः पास याके जीका बिल । ज्ञानमाला खलःतय्गु तारीख नं लिक्का बिल ।

ने० सं० १०६७ सालया अन्ते धर्मोदय समां नेपाल भाषां 'धर्मोदय' पत्रिका हे पिकया बिल । अले जेलं पिहाँ वःपि लेखकपिं व भारतं दुहाँ वःपि भन्तेपिनि ज्या दत । कविता, कहानी, निबन्धादि लेख च्वयाः पत्रिकाय् बियां च्वन । वस्पोलयागु नं नेपाल भाषा साहित्य व सांस्कृतिक लेख पत्रिकाय् बराबर पिहाँ वयां च्वन । थथे धर्मया नाप नापं नेपाल भाषाया सेवा याय् दयाः भन्तेपिं व उपासकपिं नं ल्युताया च्वन ।

विक्रम २००७ सालया क्रान्ति लिपा श्री ५ त्रिभुवन नेपाः लिथ्यँनाः शाहीघोषणा जुसेलि नेपालया शिक्षित समुदाये दंदंया लिकुना च्वंगु उत्साह व उमंग भय् बियाः धमाधम शैक्षिक, साहित्यिक व सांस्कृतिक संस्था

चाय्का इल । नेपाल भाषा भाषीपिं जक थुकिं पिने गथे लाइ । ने० सं० १०७१ साल सिल्ला गाः १० खुनु क्षेत्रपाटी साहु तारावीरसिया छेँ छगू सभा जुयाः 'नेपाल भाषा परिषद्' नामं छगू संस्था चाय्केगु धकाः कोछिनाः छगू अस्थायी कार्यसमिति नं गठन जुल । न्हापांला थव सभा वस्पोल धर्माचार्यया सभापतित्वे याय्गु धकाः कोछिना तःगु, लिबाना नं वस्पोल मथ्यंगुलिं हेड मास्टर लोकमानसिया सभापतित्वे जुल । वयां लिपा नियमावली पेश याःगु चिल्ला गाः १ खुनुया सभाय् नं वस्पोल मथ्यंगुलिं हेड मास्टर साहेवं हे सभा सञ्चालन याना दिल ।

विक्रम २००८ सालं निसैं जांच काय्गु यानाः श्री गणेशमानसिंह कुलपति यानाः बीरगंजे 'नेपाल राष्ट्रीय विद्यापीठ' धकाः छगू परीक्षण संस्था चाय्कुगुली नेपाल भाषा नं दुथ्याके माः धयागु नेपालभाषा परिषदया आवेदन रजिष्ट्रार जीवनेश्वर मिश्र द्वारा स्वीकृत जुया वसैंलिं दय्कुगु बीद (मिडिल) निसैं प्रवेशिका, विशारद व रत्न थ्यंकया नेपाल भाषाया पाठ्यक्रम वस्पोल धर्माचार्यया हे सल्ला कयाः नेपाल भाषा परिषदं दय्का छ्वत । २००८ सालया परीक्षा न्हापांगु जूगुलिं २००९ सालया उयेष्टं तिनि काय् फत । उकी नेपाल भाषां साहित्यरत्न परीक्षा बीपिं दुगुलिं वस्पोलं नेपाल भाषा व नेपाल भाषा साहित्यया इतिहास सम्बन्धी ८।१० गृ लेक्चर बियाः परीक्षार्थीपिन्त सहायता याना सबिज्याःगु जूसा विद्यापीठे माध्यम रूपं नेपाल भाषा दुथ्याके बियाः साहित्यरत्न थ्यंक नेपाल भाषां परीक्षा काय्कागु सिद्धि हे वनिगु ।

विक्रम २००९ साल मार्घ लाय्कुली च्वसा पासाया बिराट् नेपाल भाषा साहित्य सम्मेलन । अन नं न्हापांखुनु हे वस्पोलयात सभापति याय्गु धका कोछिना तःगु, तर वस्पोल २ बजे जुया नं मथ्यसैंलि

श्री सिद्धिचरणयात सभापति यानाः सभा सुरू यात । वस्पोल ३॥ बजेती तिनि थ्यन । अथे हे निन्हुखुनु नं वस्पोल ई पुइकाः नं मथ्यनाः थ्व पंक्ती लेखकयात सभापति यात । उखुनु नं ४ बजेती तिनि थ्यंकः बिज्यात । लिपा खुनु नं भचा पियाः श्री फत्तोबहादुरसियात सभापति ल्ये धुंकाः वस्पोल थ्यंकः बिज्यात । अले मंचे थकयाः परिचय पूर्वक वस्पोलयात आसने बिज्याकल । लिपा वस्पोलया च्वया हया विज्याःगु नेपाल भाषाया प्राचीनता, लिपिया विविधता व भोगु साहित्यया महान्ताया विषये सार-गर्भित भाषण नं जुल ।

यले ने० सं० १०७५ कौलाथो २ खुनु नेपाल भाषा समितिया नेपाल भाषा विराट् साहित्य सम्मेलन थ्व पंक्ती लेखकया सभाप-तित्वे जूगु । उकिया उद्घाटन वस्पोलयात हे याकुगु । अन नं वस्पो-लया नेपाल भाषा सम्बन्धी छगू भाषण जूगु दु ।

ने० सं० १०७६ सालया बङ्गलागाः ४ खुनु यतखा बाहाले च्वसा-पासाया जन्मदिन, श्रेष्ठ सिरपाः व उपाधि सहित प्रमाण पत्र प्रदान उत्सव । श्री सत्यमोहन जोशीया ‘जय प्रकाश’ महाकाव्ययात श्रेष्ठ सिरपाः व नेपाल भाषाया खुम्ह सेवकपिन्त उपाधि नं प्रदान जूगु दु । उकी वस्पोल धर्माचार्ययात च्वसापासाया पाखें ससम्मान ‘भाषा जवाः’ उपाधि प्रदान जुल ।

धर्मोदय सभां नं वस्पोलया शीले निष्ठा व धर्म नांयात त्वयूक अभि-ज्ञता खनाः सभाया धर्मानुशासक पदं बिभूषित यानाः चतुर्थ विश्वबौद्ध सम्मेलने नेपाली बौद्धतय् छम्ह प्रतिनिधि याना छ्वःगु दु । थ्व खँ धर्मोदय सभाया विश्वबौद्ध सम्मेलनया अंग्रेजी रिपोर्ट छापेजुगु दु ।

विक्रम २०१७ सालया ज्येष्ठ ७ गते च्वंगु श्री त्रिभुवन विश्वविद्यालयया सिलेबस कमिटि १९६२ सनया निति बी० ए० तकयात नेपाल भाषा नं दुथ्याकेगु यानाः थव पंक्ती लेखकयात कन्भीनर यानाः 'नेपाल भाषा पाठ्यक्रम उप समिति' नं दयकुगु व एम० ए० या निति प्राचीन इतिहास व संस्कृति छगू व मेगु पाली नं तःगुलिं वस्पोलयात पालीया पाठ्यक्रमे सदस्य यानाः पालीया अस्थायी लेक्चरर नं नियुक्त याना तःगु दु ।

विक्रम २०१८ सालया कार्तिक कालेज अफ एजुकेशन अन्तर कालेज नेपाल भाषा साहित्य सम्मेलन पाः फःगु । थव पंक्ती लेखक नं नेपाल भाषा पाठ्यक्रमयात नेवारी धकाः छापे याना हःगु खनाः थके मुना च्वंगु शिलापत्र, तामापत्र, ताडपत्र, पुलांपुलांगु सफू, अन्य भाषाभाषी विद्वानपिनि धापू, संस्था संस्थाया नां व प्रचलने वया च्वंगु न्हःन्हःगु नं नेपाल भाषांकित प्रमाण ज्वनाः नं वायू धकाः वना च्वनागु । अन वस्पोलयात मोटरे तयाः हल । उथाय् थ्यंबले वस्पोल तस्सकं हे बमलाय् धुंकुगु जुया च्वन । तीजक मञ्चे थतयंकाः सम्मेलन उद्घाटन याके बिल । वस्पोलया च्वया हया बिज्याःगु छगू भाषण नं मफु मफु च्वनाः बिज्याःगु दुगुकी नेपाल भाषासाहित्यया विशेषता गाक वयना तःगु दु ।

मेगु छगु वस्पोलया विषये लुमंके बहःगु खँ थव दु सुं विदेशी विद्वानपिसं सुं नेपालीयात नेपाली धकाः अज्ज बौद्ध धकाः सिल कि काचाक हे न्यने लाकई—'छु धर्मादित्य धर्माचार्ययात छिम्ह स्यूला ?' मीसं 'स्यू' धकाः लिसः बिल कि वस्पोलया विद्वताया प्रशंसा यायां 'आः वस्पोलया छु याना च्वन, म्हंफुला मफुला' इत्यादि इत्यादि खँ नं न्यने धुंकइ । थन्यागु खँय् थव पंक्ती लेखक तःको मछि हे लाःगु दु । अथे हे मेमेपिं यक्कसित जूगु न्यने ताय् दु ।

थुगु प्रकारं धर्म व भाषा नित्ताया जन्म भर हार्दिक सेवा यार्या म्हाय्
कुमारी वसुन्धरादेवी, काय् धर्ममान, म्हाय्पि कुमारी चमेली,
कुमारी चारुमती, कुमारी लोचना व काय् सुवर्णमानपि खुम्ह
दय्काः वस्पोलयात पक्षाघातया लोचं थिल खनी । वस्पोलया जहान
परिवारपिनि अखण्ड सेवा, डा० केशवानन्द वैद्यया निशुल्क उपचार व
का० न० पं० या प्रधान पंच श्री गणेशमानया अध्यक्षताय् गठन जूगु
‘धर्मादित्य सहयोग समिति’ या सेक्रेटरी सुदर्शन श्रामणेर अपाय्चो
ब्बां ब्बां जूगु फुकं सित्ति वंक अन्ते नेपाल संबत १०८३ साल
दिह्लागाः ३० संचवाः खुनु ६२ दँया वयसे वस्पोल धर्मादित्य
धर्माचार्य धाथें फी लुं मस्यूनि—मथूनिपि नेपाली बौद्धपि व नेपाल-
भाषाभाषीपिसं बुद्ध धर्म व नेपालभाषाया महत्व बांलाक थ्वीके खंके-सीके
मलाकं निभाः लुकुबीथें सुतुक स्वर्गे बिज्यात । आः भाबा भांगु वंकाः आबा
हाला लुचाः ? स्व० गङ्गाबहादुर ‘नदी’ यात धयातःगु नं दु—

“धैल्व लुं वैत धाय् माःसा समुद्रयात धा धका
गुमय् छं याय् मते मौका ल्याहां हानं थ्व वैमखु”

१०८४ चउला थो १

—चित्ताधर ‘हृदय’

नेपालभाषा व थ्वया साहित्य

(Nepalese Language and Literature)

[नेपालभाषा व थ्वया साहित्य—नेपालया उत्पत्ति—न्हापां भारतवर्षे लोक वया वास यात—चीनया लस्कर व राजपुत्र नेपाले—नेपाल शब्दया उत्पत्ति—नेपाल व नेवार व हे—नेपाल भाषाया उत्पत्ति—चीनया लस्कर वर्सेलि हानं भारतया लोक संख्या बढे जुल—नेपाल भाषा आखलया सम्बत—नेपालभाषा देशभाषा—नेपाल जाति—नेपाल साहित्यया आखल—नेपालभाषा साहित्य नेपालभाषा साहित्यया सूची]

नेपालभाषा व थ्वया साहित्य

भारतवर्षया शिक्षित जनमंडले साधारण लोकमध्ये हनं साहित्य व ज्ञानया मूलमूलगु थायस नेपालया भाषा व साहित्यया खेँ छुं भ्रान्ति व अज्ञान बढे जूगु खनेदु । अकिं प्राचीन नेपालया इतिहास व साहित्यया प्रमाण बिया वर्तमान अनुसन्धान बिधिं नेपालया मुख्य देशभाषा जुयाचोङ्गु नेपाल-भाषायात सम्यक् रूपं व्याख्या याना केनेगु भी सकल नेपालबासि अशुद्ध भाषां नेवारजाति मात्रया परम कर्तव्य खः ।

सद्धि दँति दत वहे प्रख्यान्तद्वा अंग्रेज पण्डित व न्हापांयाद्वा नेपाल-शास्त्र लुयिका बिलायते यंकुद्वा ब्रायन् इफ्टन् हज्सन् नेपाले वया नेपालया

पुलांगु संस्कृत व नेपालभाषाया अपालं सफू इङ्गलैण्ड (बिलायेत्)
 फ्रान्सादि प्रधान देशे यङ्का अनया प्रख्यान्तगु पुस्तकभण्डारे तसैं निसैं पूर्व
 व पच्छिम महाद्वीपया मिनायेफ्, कन्ररेडि, माक्समूलर, एलिस गेति (मेम्)
 सेसिल बेंडाल, करन्, सिलमेन् लेभि, ताकाकुसुं, कावागुचि, साकाकि,
 राजेन्द्रलाल मित्र, हरप्रसाद शास्त्री प्रमुखं नेपालया संस्कृत व नेपालभाषां
 चोयातगु अपालं सफू माला प्रकाशयाये धुङ्कल । अयन्हं थुमिसं नेपालभाषा
 धालसां अशुद्धरूपं नेवारि भाषाया इतिहास व साहित्य सफूयात गुलि
 नेपालवासिं प्रकाश यायेफु उलि थुमिसं यागु मखु । काय धालसा गुथायत
 थुमिसं म्हीगु देशे वया म्हीगु भाषा म्हीके सयेकि बोनि मखु उथायत अमिसं
 म्हीगु देशभाषायात प्रकाश याये फयिमखु । समय व उन्नतिया चक्रं याना
 थ्व म्हीगु मातृभाषायात उद्धार व प्रकाश यायेगु अवसर म्ही नेपालजातिया
 कुलपुत्रपित हे लात । पृथिविया चीन, जापान, बिलायेत् अमेरिका
 प्रभृति सभ्य, उन्नत व शिक्षित देशे चौपिसं थःथःगु मांया मूले सयेकागु
 भाषा व थ्वथा साहित्ययात गुजोगु अपूर्वरूपं उन्नति यात व स्वया आनं
 म्ही नेपालीतसैं थःगु भाषा व साहित्ययात उन्नति यायेगुली कुट मयातसा
 म्हीन तधंगु पाप लायि । अकिं थगु देशे चौपित नं भारतवासिपित बोध
 यायेत नेपालभाषा साहित्यया संक्षिप्त वर्णना यायेत्यना ।

नेपालया उत्पत्ति

नेपालया आदिगु बंशावलि नेपालि धालसां नेवारपिनिगु खः ।
 सत्यगुगे नेपाल हिमालय च्वापुगुं चाहुयेकातगु नागं बासयाना चौंगु ङ्गू
 दहँ खः धका म्ही आजुपिसं बंशावलिस चोया थकल । भूमिशास्त्र व देशया
 इतिहासया प्रमाणं थ्व नेपाल नागबास धालसां कालिनागया बास जुयाचोंगु

खनेदु । फी आजुपिसं न्हापां वया वास यागु थाय नेपालया उत्तर-पच्छिम दिशाय चोंगु पर्वते धका धायि । थ्व नागहृदया हाक ७ कोये ब्यानं ७ कोये ।

न्हापां भारतवर्षं लोक वया बासयात ।

सत्ययुगे मध्यदेशया बन्धुमति नगरं विपश्चि बुद्धं ब्राह्मण-क्षत्रियादि पिगु कुलया लस्करयात बुद्धधर्मे तथा धुमितनं नेपाले बोनाइल । नेपालया लिपाया खँ डेना अपालं लस्कर थ्व उत्तर-पच्छिमस चोंगु पर्वते हे चोन धायि । अकिं न्हापां मनुषं बास यागु जम्बुद्वीपं हे जुल धका धयातल । अनं लिपा दोलंदो दँपाक सिखि तथागत जम्बुद्वीपं अपालं भिक्षु भिक्षुणि उपासक व उपासिकापि बोना नेपाले बिज्यात । चयेपिदोल कल्प लिपा अनुपम नगरं विश्वभु बुद्ध अपालं शिष्यपि सहित बिज्यात । अनंलि बिज्यात महा-चीन देशं मञ्जुश्री बोधिसत्त्व ।

चीनया-लस्कर व राजपुत्र नेपाले

थ्वसपोलं थन स्वयम्भू बुद्ध उत्पत्ति जुगु दर्शनयाये धका महाचीनया पञ्चशीर्ष धालसां ५ गु चोकालूगु गुंथन थ्यंक बिज्यात । थन पुखुर्थे जुया-चोंगु खना थ्व लः पित ज्ञोया सहर दयेकलसा भारत व चीनया अपालं लस्करयात हित जुयि धयागु खँ थुयिका ह्युछेकाप धागु थायस चोंगु पर्वत-यात छेदन याना लख ब्याक पितज्जोत । अनंलि चीनं अपालं लस्कर व चीनया कृषि, शिल्प, बाणिज्य इत्यादि चीनया सभ्यगुण हया थमं बोना ह्याह्म धर्माकर राजकुमारयात नेपालया न्हाप्पांया सहर मञ्जुपत्तन व थ्वया राजधानी राजपत्तन दयका थ्व आदिगु देशया राजा यात । उखुन्हुं निसैं भारतं व चीनं वःपिं मध्ये नेमं राज्य याया नीति थ्व देशयात नेपाल नं बाल ।

नेपाल शब्दया उत्पत्ति

(१) पण्डित हजसन साहेब व अशोक महाराजाधिराजं दयेकुगु पत्तन धालसां यल सहरया पण्डित अमृतानन्दं धया थकुगु दु, छु धालसा स्वयम्भू बुद्धया थायस (भूवने) यंकिगु जूया नीति 'ने' धाल । व थायस यंकिगु धालसां रक्षा याना तःगु जूया नीति 'पाल' धाल । अर्थात् नेपालया रक्षा-कर्ता स्वयम्भू भगवान जूयानीति थ्व देशया नाम 'नेपाल' जुल ।

(२) लिपा लिपा शिवमार्गि नेवार व गोरख देशिपिसं प्रमाण व्यूगु छु धालसा ने धयान्द मुनियार्के थ्व नेपाल शब्द जुल । राईटं प्रकाश यागु म्नीगु वंशावलिस स्वल्सा 'ने' धालसा 'नेयम' धयाम्द थ्व देशया हिन यायेगु ज्याय तत्पर जुम्ह स्वयम्भू बुद्ध भगवानया शिष्य धका चोया तल । थ्व डिगू शब्द प्रमाण नं धर्मया प्रमाण जुल । न्हापांयागु प्रमाण सोलसा थ्व आदिबुद्ध दु धयागु खःसा जक व प्रमाण ज्यू । ने मुनिया प्रमाण नं निर्णय याये मानिगु जुल । हजसनं छु चोल धालसा 'नेपालया वंशावली न्हापां जुजु जूपिं शिवमार्गि गोठलापिनिगु अर्थात् पशुपतियात पूजा यापिं पाशुपतपिसं 'ने' धालसां नेयम् धयाम्द ऋषियार्के राज काःगु धका चोया तल । परम थ्व खँ सर्व प्रकारं शङ्का याये मानिगु जुल । रे.गु वंश धालसा सीदयेक हे असम्भयपिनिगु जुल, गुम्दसिया जा संस्कृत व भारत लिसे सम्बन्ध दुगु हे मखु । थ्व छु धालसा नेपालया पूर्व पाखे च्वंपिं किरांतिपिनिगु । थ्व प्रमाण निर्णय याये फुगु मखु । पण्डित सिलभेन लेभिंन थःगु 'ल नेपाल' धयागु पुथिस व्यूगु दु । थ्व प्रमाण लिपा वःपिं ब्राह्मण पिनिगु दन्तकथाया आधारे दयेकुगु जूयानीति नेपालबासिपिसं माने मजू ।

(३) दकसिन्ने सम्भवगु प्रमाण थ्व खः । जम्बुद्वीपं व चीनं वःपि लस्करयात धर्मं धालसां नेमं पालन या या नीतिं “नेमेन पालितं यस्मात् नेपाल” ‘नेमपाल’ धालसां नेपाल धागु खः । धापिनं दनि । थ्व हे प्रमाण मतान्तर पक्षपात रहितगु खनेदु ।

नेपाल व नेवार व हे

मस्यूपिसं धायि नेपाल व नेवार व हे मखु । परम भाषा-शास्त्र व वंशा-बलिया प्रमाणं नेपाल व नेवार छगो हे खँगोया अपभ्रंश जक खः । यद्यपि न्हेसः च्यासः दं न्ह्यः नायरदेशं नायर धासां न्यार हे जुलसां वःगु दु तथापि थुपि दैबज्ञ जोसि इत्यादि २।४गु जात जक खः । मेपि सलंसः जा न सिमांगढं वःगु खः न नायर देशं । यद्यपि थुगु समये नेपाले नेपालि धालसां नेवार, परवतिया, गोर्खालि व मदेशित चोना चोंगु खनेदु अयन्हं नेपालि, नेपालभाषा, नेपालिजाति, नेपालधम्मया विशेष प्रभेद खनेदु । छायधालसा नेपालया प्रख्यान्तगु वृहत् स्वयम्भु पुराणे नं थये चोयातःगु दु ।

हिमालयनिवासिभिः नेपालवासिभिस्तथा ।

मध्यदेश वासिभिः सर्वैश्च देशवासिभिः ॥ वृ० स्व० पुराण, पौ १४७ हाकनं—अत्र नेपालजाः वापि अन्यत्रजा विशेषतः । थ्व हे पौ २०७अत्र नेपालवासिभिः । थ्व हे पौ ४३२

थुकिं सीदु यद्यपि लिपावःपि मनूतनं नेपालि हे धायेमाः तथापि नेपालयापि थुपि नं खः परम थमिगु भाषायात नेपालिभाषा धायि मखु । गुगु नेपालवासिपिनिगु भाषा खः वयात जक नेपालभाषा धालसां नेपालि धायि । पर्वते चोंपि हिमालयवासिपिनिगु भाषा पर्वतिया । गोरखा देशे चोंपिनिगु भाषा गोर्खाली धालसां गोर्खाभाषा । खजा थ्व दे नं नेपाल

साम्राज्य दुने लाया नीति थुपि नं नेपालि भाषा धका खँ ज्या ऋङ्केत जक धायि । अयन्हं नेपालबासि धालसां नेपाल धालसां नेवार जातियागु भाषा-यात नेपालभाषा नेपालि (अंग्रेजि Nepalese, धायि । पर्वतिया व गोर्खाली भाषायात जक कदापि नेपालि धाये मज्यू । गथे आयरिश लंग्रे जी धाये मज्यू अथे धोल धायेव अपालं भ्रान्ति जुयि ।

आ नेवार व नेवारि क्वाय नेपालि खः धका धालसा भाषा अशुद्ध जुयिव अर्थात् भाषाशास्त्रया प्रमाणं नेपालिया नेवारि, नेपालया नेवार जुयिगु स्व भाव हे खः । सङ्घि दं न्ह्यो हजसन् व अमृतानन्द मध्ये सम्बाद जूगु बेलस पण्डित अमृतानन्द लिखः बिल—“नेपालदेशवासिणि नेवारत खः । संस्कृतं व देशयात नेपाल धायि, व देशबासिणि नेपाली धायि । इनं नेवार व नेवारि खँगो जा “पा” या “वा” इनं “ल” या “र” धायेगु अशुद्धरूप जूगुलि जक खः ।” गथे धर्ममान जुलसां लोकं ‘धमा’ धका धाधायेन । खयतसँ बन्द्यात बांडा धायि यद्यपि थुक्रिया अर्थ मदु ।

नेपालभाषाया उत्पत्ति

नेपालया आदिगु भाषा भारतयागु जुये मागु खः । परम चीनं अपालं लस्कर वसेलि नेपालया लोकबास दुगुलि नेपालया भाषा न्हाप्पां चीनया भाषा हे जुयि धका ब्रायन हफ्टन् हजसन व पण्डित अमृतानन्द नं निर्णय यात । अभिसं निर्णय यागु खँ छु धालसा—“चीनं न्हाप्पां बास याया नीति धमिगु आदिगु भाषा चीनभाषा खः । लिपा मध्यदेशं वःपिसं व भाषा परिवर्तन जूगुलि छगू न्हूगु भाषा उत्पत्ति जुल । न्हापां वःपिं छगू हे कुलयापि खः लिपा थुपि थःगु ज्या अनुसार विभिन्न कुले विभक्त जुल ।”

भारत व चीनया लस्करया मध्ये परस्पर बिहा. एक धर्म एक भाषा जुसैलि थव भाषा नेपालया प्रधान भाषा जुल । यद्यपि लिपा नेपाले अनेनेगु बंशया जुजुपिसं राज यात तथापि थव भाषा नेपालया देशभाषा जक मखु गोर्खालित ८८८ नेपाल सम्बते दुहाँ वत्तले नं राजभाषा जुयाचोन । थव नेपालभाषा चीनभाषा थें अति सरल । छगू खँगोलं तःगू अर्थ जुयेफु । लिपा आर्यावर्त नं द्रविडदेशं नं अपालं लस्कर वसैलि थव भाषाय आपाः संस्कृत शब्द बढे जुया बल । लिपा भारतवर्षं लस्कर वःगु खं नं थुथाय ढाकनं चोये ।

चीनया लस्कर वसैलि हानं भारतया लोकसंख्या बढेजुल

त्रेतायुगया अन्ते क्षेमावति नगरं क्रकुत्तन्द बुद्ध अपालं लस्कर व राजा धर्मपाल नं बोना नेपाले बिज्यात । थुथाय ७०० कुशवज ब्राह्मणपिं व अभयन्दद क्षत्रियपिं मिश्रुमिश्रुणिपिं जुल । अपालं दै लिपा शोभावति नगरं कनकमुनि बुद्ध अपालं लोक बोना नेपाले बिज्यात । थुकि मध्ये थन चोने धापिं व्याकं मेमेपिं थें नेपालिजातिस मिले जूवन । अपालं कल्प लिपा काश्यप बुद्ध नेपाले बिज्याना अपालं शिष्यपिं थन तोता थकल । थुगु समये गौर देशया प्रचण्डदेव राजा नेपाले वया मिश्रु जुया स्वयम्भू चैत्य उद्धार याना शान्तिकर आचार्य धायकल । थव हे काश्यप बुद्धयाकै काशी सहरया नाम जुल । अनं लिपा भारत प्रख्यान्तह्य शाक्यसिंह बुद्धया प्रवेश नेपाले जुल । थवसपोलं काशीराज सहित १३५० ह्य शिष्यपिं बोना बिज्यात । नेपाले बुद्धधर्म अपालं प्रचार यात । अपालं शिष्यपिं बिहार दयेका नेपाले चोन । अनंलि महाराजाधिराज अशोक अपालं लस्कर बोना नेपाले बिज्यागु

२२०० दँ ति दत । थनं लिपा लिङ्गि, मल्ल, सूर्यवंशि, राजपुत, गुप्तवंशि
सोमवंशि, कर्नाटकि, चन्द्रवंशि इत्यादि अनेनेगु राजवंशिपिसं थःथःगु लस्करनं
इःगु खने दु । तथापि थ्व नेपालभाषा गबलें हे परिवर्तन जूगु खने मदु ।
थ्व नेपाल भाषा सनातनं निसैं चले जुया वया चोन ।

नेपालभाषाया आग्वलया सम्बत ।

नेपालभाषा हे थ्व भाषाया नाम खः नेवारि मखु । गथे बंगालि
धालसां बंगभाषा मधासे खँ ल्हागेगु बेलस बांगला धायि अथे हे म्नीसं खँ
जक नेवाभाय धालसां नेवारि धाधायेन व्याक पुलांगु व न्हूगु सफुलिनं
नेपालभाषा हे जक चोयातःगु प्रत्यक्ष प्रमाण दु । घण्टाघर राजपुस्तक
भण्डारे, काम्ब्रिज विश्वविद्यालयया पुस्तकालये, एसियाटिक सोसाइटी अफ
बंगालया पुस्तकालये फ्रान्सया म्युजि गिमटया पुस्तकालये, तयातःगु नेपालया
पुलांगु सफुलि नं नेपालभाषा हे थ्व म्नेगु भाषाया नाम बियातल । एसि-
याटिक सोसाइटिया सूचीपत्रे १९८ नेपाल सम्बत (१०७८ क्रिष्टाब्दे
चोयातःगु बोधिचर्यावतार पञ्जिका नेपाल धालसां नेवा आखलं चोयातल ।
१४'९ नेपालसम्बते चोगु सम्पूटटीकाय ९०० दँ पुलांगु चन्द्रकीर्तिटीका
सहित आर्यदेवया चतुशतिकाय, ९०० दँ पुलांगु जातकमाला 'व नेपाल-
भाषा धालसां नेपाल आखलं चोयातःगु खः । घण्टाघरया दरवार पुस्तक
भण्डारया सूचीपत्रे (महामहोपाध्याय हरप्रसाद शास्त्रीयागु) योगमाला
धालसां हरमेखला टीका 'नेपालभाषा' सहितगु ६०० । ७०० दँ दुगु सफु
दनि । एसियाटिक सोसाइटी (बङ्गाल) या सूचीपत्रे सद्धर्म पुण्डरीका
सूत्र भयागु सफुलि "नेपालभाषा सम्बत ८०१" धका चोयातःगु दु ।

कामिब्रज विश्वविद्यालय पुस्तकालयया सूचीपत्रे अभिनव राघवानन्द नाटक
दयेकूह भानिकय धयाह्म पण्डितं दयेकूगु विवृत्ति धयागु अमरकोशया नेपाल-
भाषाटीका धयागु महाराज जयस्थिति मल्लया पालाय ५०६ नेपाल सम्बते
(१३८६ क्रिष्टाब्दे) चोगु सफू दनि धका चोयातल । थ्व सफुलि थये
नं चोयातगु दु ।—

कृतैषा अमरकोशस्य तेन नेपालभाषया

इनं—माणिक्यविरचितो अमरकोशस्य नेपालभाषाटिप्पणी समाप्तेयं ।
स्वस्तिश्रीमन्नेपालके सम्बत्सरे ५०६...श्रीजयस्थिति भूपाले नेपाल-
राष्ट्रशास्तरि ॥

चोययागु प्रमाणं प्रत्यक्ष खनेदु नेपालि, नेपालभाषा नेपाल सम्बत,
नेपालराष्ट्र इत्यादि नेपाल शब्द हे प्रयोग यागु दु नेवार न्यार धका गनं
चोगु मदु । चोयेयागु प्रमाणं नेपाल आखलया सम्बतया १००० दोलकि
दै ति मया । दोलकि दै पुलांगु नेपालभाषाया सफूजा आ नं दनि । थुकि
खनेदु नेपाल आखल दोलकिनं अधिक न्हापायागु हे खः ।

नेपालभाषा देशभाषा

नेपालया संस्कृत व नेपालभाषा साहित्ये नेपालभाषायात देशभाषा धका
नं चोयातःगु दु । थुकी आश्चर्य्य छुं मदु । नेपालया मूलमूलगु सहर, गांमे,
थायथायस नेपालित हे बासयाना चोगु दुयानीति थ्व देशभाषा खः ।

नेपालि जाति

थ्व नेपालभाषा थःगु मातृभाषा देशभाषा नं धका माने यापि नेपालया

लोक संख्याया ३ भागे २ भाग दु । थुक्सिनं अधिकांश बुद्धमार्गि, अल्पांश जक शिव मार्गि व शाक्त । नेपाले बन्द्यत जुको सन्यासित जात मदुपि धका महाराज जयस्थिति मल्लं मेमेगु कुलयात्रेसिनं चोय तथा थकल । बन्द्यपि अर्थात् भिक्षु कुलयापि जक ६००० खुदोल दु धालसां न्हापा स्वया आपालं बडे जुल । तान्त्रिक आचार्यपि ७०० न्हयेसः दु । हनं बन्द्यनि आचार्यनिपि उलि हे दनि । अनंलि मेपि ६४ गू कुलयापि दु । थुक्सि पञ्चगौड व पञ्चद्राविड ब्राम्हून नं दु । ४ गू कुलया जैसित दु । आचार्य ३, वैद्य ४, श्रेष्ठ आपा । ज्यापुत ३६ गू थरि दु । थुक्सि ३२गू थरि ज्यापुत दु । कुम्हात ४ गू थरि । पोध्यातये ४ गू थरि दु । यद्यपि महाराज जयस्थिति मल्लं ५४९ (१४२९ क्रिष्टाब्द) नेपाल सम्बते नेपालया विभिन्न कुलयापिनिगु थिति दयेकल, अयन्हं आपालं भेद दनि । नेपालया प्रधान धर्म बुद्धधर्म जूया नीति अधिकांश लोक बुद्धमार्गिपि हे खः । थ्व ब्याक कुलया मूलभाषा नेपालभाषा हे खः । ब्याक्कसिनं नेपालभाषा चले यागु खनेदु । ४८१ नेपाल सम्बते (१३६१ क्रिष्टाब्दे) राजा जयराज मल्लया पालाय दैवज्ञ अनन्त राम दक्खिन भारतं वया थ्व हे भाषा चले यागु खनेदु ।

द्राविड देशं जातभेद दुपि आपालं मन्त सुसभांया पञ्जाय मलाकेत नं मेमेगु कारणं नं जुलसां नेपाले शरणबया ळगू जक जात जुया च्वंगु नेपालि समाजे परिवर्तन यात तथापि हज्सन साहेवं व पण्डित अमृतानन्द धार्थे नेपालया आदिवासिपि मध्ये थी ज्यू थी मज्यूगु थिति मदु । थुमिसं गृहस्थ व सन्यासिया अनेनेगु कर्म याना चोन । अयन्हं थुमि प्रजायागु थिति दु गुगुया प्रमाण आतकं खने दनि । थःथःगु ज्या थमं हे चले यायेगु शक्ति, लोकया देवले पोरे थें जोपि थीमत्यःपि पुजारी जुया थजापिनिगु पूजा याना बीगु इत्यादि शक्ति अधिकार छुं दृष्टान्त जुल । हज्सनं थःगु सफुली चोल

छु धालसा—“गुगु बेलाय थव मध्यदेश वःपिं नेपाले आपा दत्त, अपिं व अमि सन्तानत उत्तर पाखें वःपिं अर्थात् न्हापा वास याना चोपिं लिसे नेपाली धालसां नेवारी नामं थुपिं व्याकं मिले जुल । थुमि मध्ये भेद जा थमि थःथःगु कुलं ज्या याना बःगु अनेनेगु ज्या व्यपारयागु जकं भेदभाव खनेदु । थुकथं न्हापान्हापा निसैं नेपाले पिगू प्रकारया गृहस्त दु छु धालसा ब्राह्म, क्षत्रि, वैश्य व शूद्र हनं सन्यासित पिगू प्रकारयापिं दु गथे बने व विहारे चोना चोपिं, मिश्र, श्रमण, चेलक व अर्हत हनं थुपिं व्याक बुद्ध-मार्गित जुया चोन ।” थुगु समये चेलक व अर्हतपिं द हे मदुसां बुद्धमार्गित आपा दनि ।

नेपालया वंशावलि स डाक्टर दानियल राईटं धाल—“बंद्यपिं संन्यासित थें हे खः गुम्ह गुम्ह जा जातभेद मदेक ढगू हे वर्गयापिं खः ।” नेपाल सम्बत ५४९ स महाराजाधिराज जयस्थिति मल परलोक जुयिन्ह्यः नेपालया धर्म व समाजया थिति निर्णय याना लोकया नीतिं अपूर्वगु ज्यायाना थकल । व निर्णय यागु खँ छु धालसा बन्द्यत (अर्थात् बनियाये योग्यपिं) जात मदुपिं जूया नीतिं ६४ गू गृहस्थ कुलयाबेसिनं चोये तया अलग याना थकल । थव ६४ गू कुल धालसां उपसमाजत थुपिं खः—

(१) पञ्चगौड, पञ्च द्राविड, देव ब्राह्म धयापिं द्विज, विप्र ब्राह्मण, (२) भूप, राजा अर्थात् क्षत्रिय थेगये थकू अर्थात् थकू जुजुपिं, मल्लपिं मेसेपिं सूर्यवंशी व नेपालया क्षत्रिय राजवंशीत, (३) अमात्य, मन्त्री, धालसां सचिव—थुपिं न्हापा न्हापा मन्त्री, राज्याधिकारी, मन्त्री सभाया सदस्यपिं (४) लेखक, राजलेखक (राज्य न्यायया खँ चोयिपिं), (५) कायस्थ, कैत (चोयिपिं, सफू, चोयिपिं राज्यया ज्याखँ चोयिपिं), (६) पूजित (शिव व शक्ति दुगु देगले पुजारि), (७) देवचिन्त (शिवमार्गि पुजारि,) (८)

आचार्य्य, आचाजु (छुं पूजा क्रियाय शिवमार्गिपिनि पुजारि) (९)
 देवाचाजु, देवाचार्य (देवले पुजारित), (१०) गुर्वाचार्य्य (शिवमार्गिपिनि
 दिखाबीपिं व छुं क्रियाय पुजारित), (११) कर्माचाजू, कर्माचार्य्य
 (तलेजु भवानिया देवले चिकीधंगु कर्म यायिपिं), (१२) शिवाचार्य्य
 (लिङ्ग पुजाय् व मेमेगु छुं पुजाय् पुजारित), (१३) पीठाचाजु, पीठाचार्य्य
 (पीठे पीठे व प्रायश्चित्त यज्ञ बलिकर्म पुजारित), (१४) जोसि, जैसी
 (१५) दैवज्ञ, (१६) ज्योतिष्क व (१७) गणिक थुपिं ४ गू भिन्न भिन्नगु
 ज्योति शास्त्रया ज्या यायिपिं, (१८) श्रेष्ठ, भारोस (थुपिं न्हापा क्षत्रिय
 जुया लिपा व्यापारित जुलसां लेखकपिं जुल), (१९) निकूजु, न्यकू
 (आर्यावलोकितेश्वरया प्रतिमाय चोयिपिं व्यपारित, बुँज्यायिपिं), (२०)
 भनी ४४४ नेपाल सम्बते राजा हरिसिंहदेवं हःम्ह तलेजु भवानिया
 सेवकपिं, (२१) बाग-श्रेष्ठ धालसां बाग स्यस्य, (२२) लवजुं, (२३) भजुं
 (उसाय् मदुग वेलाय धर्मया पुरोहितपिं), (२४) गवकु (चिकिधंगु देवले
 पूजा यायिपिं वैश्यत, (२५) वैद्य धालसां धन्वन्तरि (वैद्य ज्या यायिपिं
 वैश्यत, (२६) राजलघत, (२७) थकूलव अर्थात् पात्र वंश (शस्त्रास्त्र धारण
 यायिपिं), (२८) आलमु (आचालमु, आचालव ?) (२९) श्रीवन्त, (३०)
 सुजिकार, (३१) सुपिक धालसां सुर्पाकार, (३२) विच्छक, (३३) शिल्प-
 कार, (३४) दारुकार, सिकमि, (३५) तक्षक (सिफाइम्ह बोस्य), (३६)
 तुलाधर, उदोस, स्थापित, (३७) सुवर्णकार, छुँ कमि, (३८) कंसाकर, कंस,
 (३९) ताम्राकर, तमो (४०) कुण्डकार, हस्तियारया ज्या यायिम्ह, (४१)
 लोहकार, न कमि, कौ, (४२) शीलाकार, लोहकमि, (४३) धूसः, (४४)
 मध्मि कमि (४५) चित्रकार, चित्रकारि पुं (४६) रजक, रज्जक, छिपा
 (४७) धुब्ब्या, (४८) कर्णकार (न्हाय्पं प्वा खनिम्ह) (४९) नाडि छेदि,

अमः (पिथ्यनिम्ह), (५०) बहि, यं कमि (यं दयकीम्ह), (५१) भाः (ऊनछीम्ह), (५२) तत्ति, (सीबले भुनिगु कापः थायिम्ह) (५३) मालि, गथु (५४) खा, गवकु. हेँपू, मेपू सापू (सामे भयिम्ह ब दुदु बजा), (५५) क्षेत्रकार, दंगु बुँदायिपि, (५६) कुम्भकार, कुम्हाः, (५७) नापित, नौ, (५८) भारिक, भरिया (कोबीम्ह), (५९) लेपिक, वज्रकमि (पायिम्ह), (६०) चर्मकार, मातंगि, कुलु, (छयंगूयाज्या यायिम्ह), (६१) तैलकार, सायमि, मानन्धर, (६२) टङ्काधारि 'दांत्यायबीम्ह), (६३) नटीजीव (प्याखंहुलिम्ह), (६४) ज्यापू ।

पर्वतिया धालसां गोर्खा भाषाजुयेवं देश-भाषा थ्वयात धायि मखु । हिन्दुस्थाने ३०० गूति भाषा दतसां हिन्दीभाषाहे मुख्य देश भाषा जुया चोन । यद्यपि मुसुमांतसे ७०० दँ तक राज याना उर्दू व फारसि राजभाषा यात, इनं अंग्रेजत वसेलि अंग्रेजि राजभाषायात तथापि हिन्दी भाषा हे देशभाषा जुयाचोन । अथे हे नेपाले नं नेपालभाषा हे देशभाषा खः इनं पर्वतिया धालसां गोर्खालि राजभाषा जक खः ।

नेपाल साहित्यया आखल

नेपाले गुलि शास्त्र सफू दु व ब्याक्क याना नेपाल साहित्य जुया चोंगु खतसां परवतिया भोट भाषाया सफू तोता नेपालभाषा व संस्कृत भाषां चोया तःगुयात जक नेपाल धालसां नेपालि साहित्य धायि । मेपिसं धायि नेपाल साहित्य छगू आखलं चोया तःगु मखु । नेपाल साहित्य संस्कृतं व नेपालभाषां चोया तःगु खः । परम् भारतया अनेनेगु देशं बौद्ध व मेमेगु मतया सफू वःगुलि तःगू प्रकारया आखलं चोया तःगु दु । परम् थ्व ब्याक आखः न नेपाल साहित्यया आखः खः, न नेपाल भाषाया । संस्कृतया

दकसिबे पुलांगु आखल रज्जना हे खः । नेपालभाषाया थःगु हे नेपाल आखः दु । थुमिगु विशेष व संक्षिप्त वर्णना याये । गथे धालसा—

१ रज्जना—थ्व आखः नेपालया जक प्राचीनगु आखः मखु परं थ्व आखः चीन, जापान, तिब्बत आदि महायान बौद्धदेशे अपालं सम्मान याना तःगु दु । दकसिबे पुलांगु सफू मज्जुपत्तनया विक्रमशील विहारे दन्तुल्लको केनिगु दु । व सफूया आखः रज्जना आखः खः । नेपालया आदिगु संस्कृत ग्रन्थ रज्जां हे चोयातःगु खनेदु । १८०० दं न्ह्यः निसै थ्व चले जूगु खनेदु ।

२ भुजिमोल—थ्व आखःया उत्पत्ति सीके मफु । थ्व भोजदेशया आखः जुया ला भुजिया छ्यः थै चोंक चोयिगु जुया ला थ्व आखःयात भुजिमोल धायि । २९५ नेपाल सम्बते चोया तःगु प्रज्ञापारमिताया रत्न सञ्चय गाथा थ्व आखलं चोया तःगु दनि । थ्व गाथा दोलछि दं न्ह्य चीन भाषां चोल (१००० क्रिष्टाब्द व ९८० मध्ये) ।

३ पाचुमोल—पाचुसे चोंक सम जुयिक चोयिगु जूयानीति पाचुमोल धायि । थ्वया चलन १२०० दं न्हापा खने मदु । कालचक्र तन्त्र थ्व आखलं चोगु दनि ।

४ गुजिमोल व गोमो—थ्वया उत्पत्ति नं लिपायागु खनेदु । आखः गुजि तया चोयिगु जूया नीति गुजिमोल धायि । गोलाकार मोल तया चोगुलि गोमो धायि ।

५ नेपालाखल धालसां नेवाखल—नेपालभाषा साहित्यया आखः थ्व हे खः । चोये कनागु ४ गू प्रकारया आखः संस्कृत बौद्ध सफुलिस अपालं प्रयोग यागु खनेदु । परम् थुगु नेपालाखल सकल नेपालभाषा भाषिपिसं चले यागु प्रत्यक्ष खनेदु । थ्व आखलं नेपालया प्राचीन संस्कृत व

नेपालभाषाया ग्रन्थ चोगु आपालं दनि । थ्व आखलं संस्कृत सफू चोगुया प्रमाण ढगू ङिगू बिये—

१ उष्णिष विजयं धारिणि—८८ नेपाल सम्बत (९६८ क्रिष्टाब्द)

२ चतुष्पीठ निबन्ध—१६५ ,, (१०४५ ,,)

३ नारायण परिपृच्छा—४८१ ,, (१३६५ ,,)

४ पञ्चरक्षा महायान सूत्र ५०९ नेपाल सम्बत (१३४१ क्रिष्टाब्द)

६ अशोक आखल—यद्यपि भारतया अधिपति अशोकं नेपाले विजयाना अशोकपत्तन धालसां येल सहर दयेकल, तथापि थ्व आखलं चोया तःगु शिलालिपि दये मानिगु खः ।

७ कुटिलाखल—८०० दं न्ह्यःयागु गौरदेश (बङ्गाल) या महाराज नयपालया पालाय कुटिल आखलं चोयातःगु पञ्चरक्षा सूत्र नेपाले लुया वल । मेमेगु सफू नं लुया वःगु दु । परम् नेपालाखल तोता मेगु आखः चले मजू ।

८ गुप्ताखल—थ्व आखलं नं सफू चोया तःगु नेपाले दु ।

९ देवनागरी—थ्व आखल नेपाले लिपा तिनि चले जुल । १२८ नेपाल सम्बते (१००८ क्रि०) थ्व आखलं चोया तःगु अष्टसाइसिका प्रज्ञा-पारमिता लुयावल । थ्व आखःया सम्बते सोया नेपाल आखल हे अपालं चले जूगु खनेदु ।

१० कयेथि नागरि—७७४ नेपाल सम्बते (१६१४ क्रिष्टाब्दे) कान्तिपुरया महाराज जयप्रताप मल्लया शिलापत्रे थ्व आखःया नाम खनेदु, परम् सफू दये माः धयागु विचार जक दु ।

११ मैथिलि—४३३ नेपाल सम्बते, ३९० लक्ष्मण सम्बते विहार (पतना) पाखें चोया हःगु सफू नेपाले लुल । १५५० शाक सम्बते (१६२८ क्रि०) मैथिलि आखलं चोयातःगु रामपतियागु वृत्तसार सोया

थव आखः कुम्भा मिथिलां नेपाले वःपिसं चलेयागु खनेदु ।

१२ तैलङ्गि—थव आखलं चोयातःगु सफू नं लुयावल ।

१३ बंगालि—दकसिवे लिपा दुहाँ वःगु आखः थव हे खनेदु ।

(१) महाभारत प्रस्थान पर्व रामदासं चोगु ५४५ नेपाल सम्बते (१४२५ क्रि०) ।

(२) सिद्धै कवीर महामन्त्रराज—शाक सम्बत ११८९ (१७६७ क्रि०) ।

(३) बोधिचर्यावितार—१४९२ विक्रम सम्बत (१४३६ क्रि०) ।

महाराज जय प्रताप मल्ल १५ ता जातया आखलं लायेकू ध्वाखा पिने शिलापत्रस कालिया तुतः दयेकूसां फारसि, अरबि, फिरीङ्गि नेपाले चले जूगु मखु ।

चोयेयागु १४ ता जातया आखः विचार यातसा नेपाल धालसां नेवाः आखल तोता मेगु आखः चले जूगु कदापि मखु । उकिं नेपाल आखः हे नेपाल जातिया हे भाषाक्षर निर्णय याना नेपालभाषा साहित्यया व्याख्या याये ।

नेपाल भाषा साहित्य

नेपाल भाषा साहित्य बुद्धमार्गि, शिवमार्गि व साधारण भागे विभक्त याये ज्यू । हनं थो साहित्य १५ गू विभाग जुया च्वंगु खने दु गथे

धर्मसूत्र व पुराण—१२ गू बुद्धधर्मया सूत्र नेपालभाषाय भाषान्तर जूगु खनेदु । थुपिं मध्ये प्रख्यान्तगु बृहत्स्वयम्भूपुराण खः । मार्कण्डेय पुराण, स्वस्थानि व रामायण खण्डखण्ड भाषान्तर जूगु खनेदु । ललित विस्तर, शिक्षासम्बर, बुद्धोक्त संसारामय तत्वबोधि इत्यादि प्रकाश जूगु दु ।

साधारण ग्रन्थ मध्ये विवृत्ति नेपालभाषा सहित हरमेखला, ५०५ नेपाल सम्बते चोगु कुञ्जिकालघुटिप्पणो, ६६१ नेपाल सम्बते (५५८१ क्रिष्टाब्द) यागु धर्म-लक्ष्मी सम्वादया नाम चोये योग्य जू ।

२ व्यूह अर्थात् थाय व जीवन चरितया ग्रन्थ—गण्डव्यूह, गुणकारण्डव्यूह, कारण्डव्यूह, सुखावतिव्यूह, लघु स्वयम्भू पुराणया वर्णना याये योग्य । थुपि सम्पूर्णभाषा जूगु खनेमदु ।

३ जातक धालसां भगवान बुद्धया पूर्वजन्मया बाखं—आर्यसूरयागु जातकमाला, जातकावदान्, क्षेमेन्द्रकवियागु बोधिसत्वावदान कल्पलतायागु ३४ गू जातकया भाषा जूगुदु, ळगूऴगू बाखं ळगूऴगू सफू ।

४ अवदान धालसां भगवान बुद्धबोधिसत्त्वभिक्षुपिनिगु अपूर्वकथा—अवदान शतक अवदानमाला, विचित्रकर्णिकावदान अशोकावदानया खण्ड भाषा जूगु खनेदु । थुपि बिहारे, तोले, छै बाखं कनेत भाषान्तर यागु खः ।

५ कथा व बाखं थाययागु, धर्मकर्मयागु चलेजूगु—(१) द्वाविंशति अवदान कथा, हितोपदेश, पञ्चतन्त्र, स्वस्थानि इत्यादि धर्मकर्मयागु बाखं भाषान्तर यानातःगु दु । आ थथे लुयावःगु द्वादशमन्त्रि-बुद्धिकथा धयागु मन्त्रिपिसं १२ गू बुद्धिकयंगु बाखं खोपदेशे लुल । बेताल-पञ्चविंशतिकथा धालसां विक्रमादित्यया बाखं नं दु । (२) थाययागु बाखं छु धालसा आर्यावलोकितेश्वरया (करुणामय), आनन्दादि लोके-श्वर (चोबाहावाः), यमलेश्वर (ँदेशया करुणामय), कुमारदेवि इत्यादि नेपाले दुने थायथायया बाखं दु । (२) चलेजूगु बाखं छु धालसा-लाखे, रूया इत्यादि मचातयूत कनिगु बाखं नं आपा दु ।

६ महात्म्य धालसां तीथे, थाय व थितिया महिमाखं—

नेपाले ऋगूक्तागू तीर्थ व यितिया थःगु हे महात्म्य दुषा नीति थुजोगु खँ अपालं दु । अष्टमित्रत महात्म्य, बसुन्धराव्रतकथा, उपोषधव्रतविधान, एकादशिव्रत महात्म्य इत्यादि सफू दु ।

७ वंशावलि—नेपालित विसाप्रिय जू धयागु प्रमाण अमिगु वंशा-
वलि खनेदु । ऋगूक्तागू ज्याखँ जूगु चोया अपालं वंशावलि दयेकुगु दु ।
नेपालया, थितिबिधि, देवलबिहार इत्यादि मुख्य-मुख्यखँया वंशावलि
दुगु खनेदु । नेपाले दुहाँवःगु अनेनेगु सम्बतया खँ सम्बत्सारधयागु ९८२
नेपाल सम्बते (१८६२ क्रिष्टाब्दे) चोयातःगु सफू काम्ब्रिज विश्वविद्यालय
पुस्तकभण्डारे तयातःगु दु ।

८ तुतःस्तोत्रादि—बुद्धबोधिसत्त्व व देवपिनिगु तुतः दयेकुगु सफू नं
अनेनेगु खनेदु । गीतापुस्तक धयागु २-२ दं दुगु सफू नं बिलायते यङ्के
धुङ्कल । अयन्हं छँ खा पत्तिकं धायैथें संस्कृतं नं नेपालभाषां नं चोयातःगु
सफू अपालं दनि ।

९ में गीत—जुजु, देव, ऋतु, थितिनीति, चःरे, दुःखसुखया में
नं अपालं दु । अंग्रेजी नेपालया इतिहासे यशोधराया में ४४० दँ पुलांगु
प्रकाश जूगु दु । में या लिसेलिसें आखः सम्बत तयेगु चलन नेपाले अपालं
खनेदु ।

१० नाटक, प्याखं—प्याखने नं अपालं उन्नति यागु खनेदु । बुद्ध
व ३४ गू जन्मयागु, देवपिनिगु, हरिश्चन्द्रराजायागु, गोपिचन्द्रयागु, काति-
प्याखंयागु नाटक नेपाले चले जू । कान्तिपुरया राजा जयप्रकाशमल्लं नल-
दमयन्ति नाटक नेपाल व हिन्दीभाषां दयेका प्याखं चलेयात । अभिनव
राघवानन्द नाटकया नेपालभाषा लुया मवःनि ।

११ पूजाक्रियाकाण्ड —थो विषये अभिषेकबिधि दूर्गतिपरिशोधन,

महामञ्जुश्री व नाग पूजा, वागीश्वरपूजाविधि इत्यादि सफू नं चोयातःगु दु ।

१२ राजनीति व नीतिशास्त्र—बोधिचाणक्य, चाणक्यसार-संग्रह, पञ्चतन्त्र, हितोपदेश, द्वादशमन्त्रिबुद्धिकथा—थुपिं जक बालकपित बोङ्काचोंगु खनेदु । मेमेगु पुस्तकत नं दयेमानि ।

१३ व्याकरण, छन्दशास्त्र व काव्यशास्त्र—थुक्रिया ज्ञान नं अल्प हे खनेदु । नेपाले संस्कृतया प्रचार जूगु सोया सफू अवश्य दयेमानि धयागु विचार दु । पण्डित अमृतानन्दयागु छन्दोमृतलता जा भाषा सहित दुगु खनेदु ।

नेपालभाषाव्याकरण नं नेपाले दुगु खनेदु क्वाय धालसा जर्मनी यङ्का संक्षिप्त व्याकरण जर्मनी भाषां डाक्टर अगष्ट करेडि Zeitschrift der Deutschen Morgenlandischen Gesellschaft Band XVII धयागु साहित्यपत्रे १०१२ नेपाल सम्बते (१८९३ क्रिष्टाब्दे) प्रकाशयात । रुसे नं प्रकाश जूगु दु ।

१४ कोष, अभिधान—कोष व अभिधान नं मदुगु मखु । व हे जर्मनीसाहित्यपत्रे संस्कृत व नेपालभाषा नापं तया श्लोकं (सिलः) हे अमरकोशया संक्षिप्त भाषा प्रकाशयात । पण्डित अमृतानन्दं धर्मकोष धका धर्मया पद जक तया धर्मकोष दयेकल । थुक्रिया भाषा नं दयेमानि । नेपाले दुगु जडिबुटिया कोष जा दुगु खनेदु । चन्द्रकीर्तिटीका सहित सार-स्वत व्याकरणया भाषा नं दयेमागु खः । मेगु मचातयूत बालबोध, उपयोग-क्रमया भाषा नं दयेमानि ।

१५ शिल्पशास्त्र व भैषज्यशास्त्र—नेपाले चोंपिं बैद्यत व शिल्प-कारपिं न्हापान्हापानिसैं संस्कृत भाषाय निपुण जूगु खनेमदु । तथापि थुपिं

शिल्पविद्याय नं भैषज्यशास्त्रो नं थःगु हे अपूर्व बुद्धि खना थःगु सफू थःगु हे भाषां चोगु विचार दु । भैषज्य शास्त्रो सफू चोयातःगु अपालं दु । प्रतिमा दयेकेगु सफूया भाषा दु । बुद्धभट्टाचार्य ३८२ नेपाल सम्बते (१२६२ क्रिष्टाब्दे) दयेकूगु “रत्नपरीक्षा, इनं स्वरोदय दशा, ज्योतिष शास्त्र, इन्द्रजालविद्या” रसायनशास्त्रया खेँ नं भाषासफू दुगु खनेदु । भीसं कथाय हे संग्रह याना सोलसा अपालं सफूत लुया वयि तिनि ।

नेपालभाषा साहित्यया ग्रन्थ प्रमाण असंख्य । भीसं साहित्य भण्डार दयेका नयागु जुलसा हिन्दीभाषा साहित्ययावेसिनं अप्पो खनेदयि । मागु नेपाल साहित्ययात माक्समुलर इत्यादि पृथ्वीया विद्वानपिसं प्राचीन भारत साहित्यया लुंखानि धका प्रशंसा यागु दु । यद्यपि काव्यरचनाय भीगु उन्नति भारते थें महु तथापि नेपालया संस्कृत बौद्ध ग्रन्थयात, भाषा सफू-यात, चित्र व प्रतिमा विद्या, मेमेगु शिल्पविद्यायात पृथ्वीयागु सम्मान लाये धुन । छद्म बिलायेतया विद्वानं छु धालसा ‘नेपालया वंशावलि नेवारया वंशावलि खः । अकिं नेपालभाषा साहित्यया अनुसन्धान, प्रकाश व प्रचार यायेगु स्वयेमाल । परवतियातसें अभिगु भाषायात नेपालि धालसां नेपालि मखु । वंशावलि, साहित्य, देश व आचारया प्रमाणं परवतिया गबले नेपाली मखु । अभिसं जा थ्व नं नेपालया लगू भाषा जूया नीति नेपालि धागु खः । नेपालभाषा व साहित्य विचार यानसा नेपाल भाषा गथे हिन्दु-स्थाने हिन्दी खः वयावेमिनं उत्तमगु देशभाषा प्रजाभाषा इनं जातिभाषा नेपालभाषा हे खः ।

प्रकाश व प्रचार यायेगु छद्मछद्म नेपालिया कर्तव्य धालसां धर्मखः । थथे पुस्तकाकारं प्रकाशयानाबिलसा दोलंदो नेपालया कायम्हायपित याकनं हे

धर्म शिल्पव्यापारादि शिक्षा बी फयि, मामबुबापिं दुखदरिद्रगतिया रक्षितजुयि । कायम्ह्यायपिंत ज्ञान, धर्म, आरोग्य, शिल्प, व्यापार व मेमेगु सत् कुलाचार सुखशान्ति बढेजुयिगु शिक्षा बिये मफुसा अवुमापिसं जक दुःख सीगु मखु थव साखासन्तानंनपं दुःख सी । नीतिशास्त्रे जा बांलाक चोयातःगुदु गथे धालसा मचायात शिक्षा मबिलसा मामयात बैरी धायेगु अबुयात शत्रु धायेगु छाय धालसा थुजोगु शिक्षा मव्यगुलिं थःह्म मचा हैया पुचले बोहत चोने थ्ये ज्ञानिगुणिपिनि थाय वनेचोने लोह्म जुयिमखु । अशिक्षित असभ्य जुया कुसंतगते लाना नानाकारणं दुःखया पज्जले लायि अकिं गथे शरीरयात लः व फये मदुसा शरीरं प्राणान्त तकं जुयिगु दुःख सी माली अथे हे थःगु मातृ- माषां कायम्ह्याय पिंत धर्म, शिल्प व्यापार इतिहास, आरोग्य, शीलाचारादि मनुष्यं लाये मागु शिक्षा मबिलसा मामबुबापिं शत्रु बैरि इनं कायम्ह्यायपिं दुःखित जुयि ।

नेपाल भाषा साहित्यया सूची

१ धर्म सूत्र व पुराण—

(१) अपरमितायुध्यानि सूत्र, (२) भद्रकल्पावदान (अ०) (३) भगवान बुद्धया जन्मचरित्र, (४) बोधिचर्यावतार (अ०) (५) बुद्धोक्त-संसारामय, (६) दानगाथा, (७) धर्मलक्ष्मी सम्बाद, (ने० सं० ७०१ वेण्डालं यंकूगु), (८) हर मेखला नेपालभाषा टीका सहित, (९) काशी खण्ड, (१०) कुञ्जिका लघु टिप्पनी, (११) ललितविस्तर, (१२) महा-वस्तु (अ०), (१३) मेघसूत्र, (१४) शिक्षासम्बर, (१५) मार्कण्डेय पुराण (अ०), (१६) महाभारत (अ०) (१७) प्रज्ञापारमिता हृदय सूत्र, (१८)

रामायण (अ०), (१९) शतपञ्चशतिका, (२०) सुवर्ण प्रभास सूत्र, (२१) तत्वबोधि, (२२) विराट् पर्व ।

२ व्यूह अर्थात् धर्मयाथाय व जीवन चरितया सफू—

(२३) गण्ड व्यूह (अ०), (२४) गुणकारण्ड व्यूह (अ०), (२५) कारण्ड व्यूह, (२६) सुखावती व्यूह ।

३ जातक अर्थात् बुद्धया पूर्वजन्मया बाखं—

(२७) धनकर जातक (२८) धर्मपाल जा० (२९) कवीर कुमार जा० (३०) कोटिकर्ण जा०, (३१) महासत्त्व जा०, (३२) महीष जा०, (३३) सुदास जा०, (३४) सुधन जा०, (३५) सुपारग जा०, (३६) सुप्रिय सार्थवाह जा०, (३७) आर्यसूरं दयेकूजु जातक माला (अ०), (३८) विश्वंतर जा०, (३९) वीरकुश जा०, (४०) व्याघ्री जा० ४१।७० सूई छिगू ३२ जन्मया जातक ।

४ अवदान अर्थात् बुद्ध बोधिसत्त्व भिक्षवादिपिनिगु अपूर्व क०

(११) अश्वघोष नन्दिमुख अवदान, (७२) अशोक अव०, (७३) दिव्य अव०, (७४) कपिश अव०, (७५) कविरकुमार अव०, (क्षेमेन्द्र महाकविया बोधिसत्त्वावदान कल्पलतायागु) (७६) मणिचूड अव०, (७७) मैत्रेय अव० (७८) पिण्डपात्र अव०, (७९) पद्मशेखर अव० (८०) पद्मावती अव० (सुवर्ण वर्णावदानयागु) (८१।८४) रुक्मावती, सुचन्द्र, सुधन किन्नरि सुन्दरकुमार (बो० कल्पलता याकै भाषान्तर) (८५) वाशिष्ट अव०, (८६) विचित्रकर्णिक अव०, (८७) अवदान शतक ।

५ कथा व बाखं—

(८८) आनन्दादि लोकेश्वरया बाखं, (८९) आर्यावलोकितेश्वरया

बा०, (९०) चन्द्रमाया बा०, (९१) धर्मराज लोकेश्वरया बा०, (९२) द्वाविंशति अवदान कथा, (९३) गोमयजुया बा०, (९४) जीवन विहारया बा०, (९५) करुणामयया बा०, (९६) लाखेया बा०, (९७) महादेवया बा०, (९८) लोकेश्वर महादेवया बा०, (९९) हरिहरि वाहन लोकेश्वरया बा०, (१००) मञ्जुश्रीया बा०, (१०१) ससुमांजुया बा०, (१०२) बिक्रमादित्यया बा०, (१०३) द्वादश मन्त्री बुद्धि कथा, (१०४) सिद्धि राजाया बा०, (१०५) शिवदत्त राजाया बा०, (१०६) सिंहल सार्थवाहया बा०, (१०७) सौतिक राजाया बा०, (१०८) स्वस्थानि, (१०९) उपगुप्त मिथुया बा०, (११०) बसुन्धरा व्रत कथा, (१११) वैताल पंचविंशति, (११२) यशोधराया बाखं इत्यादि ।

७ महात्म्य धालसां थायया खँ :—

(११३) अष्टमिव्रत महात्म्य, (११४) लक्षचैत्य म० (११५) नेपाल म०, (११६) शृङ्गभेरी म०, (११७) उपोषध व्रत म०, (११८) बसुधरा व्रत म० (११९) उपोषध व्रत विधान (ने० सं० ९२८)

८ वंशावलि धालसां इतिहास :—

(१२०) नेपालया वंशावलि, (१२१) थ्व हे (लिपा वःपिं शिवमार्गिपिनिगु (१२२) नेपालया धितिपुथि (१२३) नेपालया देवलया थःथःगु वं० (१२५) सम्बतसार नेपाले चले जूगु सम्बतया, (१२६) स्वयंभू चैत्यया वं०, बैण्डा लया सूची ९८२ ने० सं०यागु (१२७) सुनयश्री मिश्रया वं०, (१२८) करुणामयया वं० ।

९ तुतः स्तोत्रादि :—

(१२९) आर्यावलोकितेश्वरया करुणास्तव, (१३०) थो चरपतिस्तव, (१३१) थो बन्धुदत्त आचार्यया स्तव, (१३२) थो रूपस्तव, (१३३)

थो मिश्रुणिस्तव, (१३४) उपोषध देवपुत्रया स्तव, (१३५) भद्रचरिगाथा, (१३६) भगवान् बुद्धया अनेनेगु स्तुति, (१३७-९) गणेश, भैरव, कुमारी इत्यादि स्तुति, (१४०) गीता पुस्तक (१३९ भाषा स्तुति दुगु ने० सं० ८२५ यागु इजसनं यंकल), (१४१।२) हेवज्जनैरात्मा (गुह्येश्वरि) व ज्योतिस्वरूपया स्तुति, (१४३) करुणामयया स्तुति, (१४४) महामञ्जुश्री स्तव (१४५) नाम संगीति (ने० सं० ९७९) (१४६) पञ्चबुद्ध स्तुति (१४७) ससुमांजुया तुतः, (१४८) स्रग्धरास्तोत्र संस्कृतमूल सहित राइट यंकुगु ने० सं० ६०४ व ८६६)

१० मे गीत :—

(१४९) बुद्धया मे (राइट प्रकाशयागु ने० सं० ५८७ यागु) (१५०। १६२) चण्डिका, गसुमलामिसा, कालि, कृष्ण, प्रीति, महाबोधि, महासत्त्व, ऋतु इत्यादि (१६३) यशोधराया मे, (राइट प्र० ५८६ ने० सं०)

११ व्याकरण छन्द व पद्य शास्त्र :—

(१६४) नेपाल भाषा व्याकरण—१०१३ ने० सं० स जर्मनी छगू भाग प्रकाश जुल । नेपाल भाषा व्याकरण न्हूगु प्रकाश जुयि । (१६५) छन्दोमृत-लता—पण्डित अमृतानन्द दयेकुगु, (१६६) सारस्वत व्याकरण, (१६७) बालबोध ।

१२ राजनीति व नीति शास्त्र :—

(१६८) बोधि चाणक्य नीति (राइट यंकुगु ९६५ ने० सं० यागु) (१६९) चाणक्य सार संग्रह जुलसां चाणक्य नीति, (१७०) हितोपदेश, (१७१) मन्त्री सप्तकथा, द्वादश मन्त्रि बुद्धि कथा, (१७२) पञ्चतन्त्र ।

१३ पूजा विधि कर्मकाण्ड :—

(१७३) अभिषेक विधि, (१७४) भीमसेन पूजा, (१७५) दुर्गति परिशोधन, (१७६) महामञ्जुश्री पूजा, (१७७) नाग पूजा, नाग साधन, (१७८) पाप परिमोचन, प्रायश्चित्त विधि, (१७९) उपोषध विधि, (१८०) वागीश्वर पूजा, (१८१) बलिमाला (१८२) बसुन्धरा कल्प, (१८३) वृष्टि चिन्तामणि ।

१४ शिल्प शास्त्रादि :—

(१८४) रत्नपरीक्षा बुद्ध मट्टाचार्य देकेगु (४८२ ने० सं० व ९३४ ने० सं०) (१८५) स्वरोदय दशा, ज्योतिष विद्या, इन्द्रजाल विद्या थुजोथुजोगु ।

१५ वासः भषज्य शास्त्रादि :—

(१८६) स्वदेशी वासःया सफू, (१८७) नागार्जुन गौषज्य पुस्तकादि, आयुर्वेदया भाषादि, (१८९) वैदाङ्ग, (१९०) द्रव्यनिर्णय [६५८ ने० सं०]

(बुद्धधर्म व नेपालभाषा

नेपाल सम्बत १०४७ बङ्गला, तङ्गला, दिल्ला, गुंला अंकं)

वसपोलया मेगु रचना

अथेला वसपोलया मेगु रचना यक्व च्वया तःगु दुसां सफू रूपं पिहाँ वःगु मखना, अथेनं वसपोलं गुगु बुद्धधर्म व नेपाल भाषा पत्रिका छगू सम्पादन याना थका बिज्यात उकिया दक्व अंक स्वयंभले मीत थ्व हे खँ बोध उवी कि वसपोल नेपालया प्राचीन इतिहासया ज्ञाता, संस्कृत व पाली बौद्धशास्त्रया मर्मज्ञ व नेपाल भाषाया अनन्य सेवक ।

उकिं ने० सं० १०४५-१०५० तक न्यादँया 'बुद्ध धर्म व नेपाल भाषा' पत्रिकाय् प्रकाशित जूगु वसपोलया छुं छुं गद्य लेखया धलःपौ कवय बियागु दुः—

१—बुद्ध धर्म	दँ १ प्रति १ व २,३,४
२—धर्मचक्र प्रवर्तन सूत्र (अनुवाद)	” ”
३—वैशाख पुणिया महिमा	” ”
४—नेपाल देशया आदिगु धर्म बुद्ध धर्म	” प्रति १
५—शिखितथागत व क्रकुच्छन्द तथागतया पर्यास बुद्धधर्म	” ”
६—निर्वाण मनुषया उत्तमगु सुख	” प्रति २,३,४
७—एकयान व ३ गू चरिया व्याक्क बुद्धभूमिस दु	” ”
८—भगवान बुद्धया न्हापा जन्मया जातक बाखं	” ”
९—शिक्षा समुच्चय (अनुवाद)	” ”
१०—बुद्ध चरित्र महाकाव्य (अनुवाद)	” ”
	व दँ २ प्रति १,२
११—नेपालया मचा मयिचापिन्त धर्मशिक्षा	दँ १ प्रति २,३,४

१२—बुद्ध धर्मया प्रश्नोत्तर	” ”
१३—भिक्षु, भिक्षुणिया अर्थ व ज्या	” ”
	व दँ २ प्रति १,२
१४—गथे यशोधरा भिक्षुणि जुल	दँ १ प्रति २,३,४
१५—बुद्धं मिसापिन्त नं मोक्षया लँ क्यनिम्ह खः	” ”
१६—बौद्ध उपासक व उपासिकाया अर्थ व ज्या	” ”
	व दँ २ प्रति १,२
१७—बुद्ध धर्म अहिंसा	दँ १ प्रति २,३,४
१८—जीवक सूत्रान्त (अनुवाद)	” ”
१९—कनकमुनि, कास्यप व शाक्यमुनिया बुद्धधर्म	” ”
२०—बुद्धधर्म प्यंगुग महापुण्य क्षेत्र (अनुवाद)	” ”
२१—नेपाली बुद्धमार्गि संघ	दँ २ प्रति १,२
२२—बुद्ध धर्म व बौद्ध जगतया समाचार	” ”
२३—नेपाल भाषा व थ्वया साहित्य	दँ ३ प्रति १,२
२४—लुम्बिनिस श्री ३महाराजया अहिंसा	
घोषणा आदि बौद्ध जगतया समाचार	” ”
२५—विश्वन्तर राजकुमारया बाखं	” प्रति ३,४
	व प्रति ५,६
२६—नेपाल भाषा	दँ ३ प्रति ३,४
२७—पृथ्वी भगवान बुद्धया जात्रा	” ”
२८—नेपाले शिक्षाया प्रयोजन	” ”
२९—अयला धौँ या विष तुल्य दुर्गुण	” ”
३०—नेपाल संवत, श्रीपञ्चमी	” प्रति ५,६

३१—मिष्ठु, गुरु पुरोहितया गुण व ज्या	,, ,,
३२—बुद्ध धर्म व नेपाल भाषाया विचार	दूँ ४ प्रति १,२
३३—सौन्दरानन्द महाकाव्यसार	,, ,,
३४—सर्व संघया अर्थ व ज्या	,, ,,
३५—नेपाल भाषा आन्दोलन व साहित्य प्रचार	दूँ ५ प्रति १ व प्रति २,३
३६—नेपालि गुठि	दूँ ५ प्रति १
३७—नेपाल भाषा पद्य साहित्य	,, प्रति ४,५
३८—नेपाल संबत म्हपूजा राष्ट्र दिया उत्सव	,, ,,

